

春融堂集



和16  
890  
15





春融堂集卷五十三

青浦 王 昶 德甫

墓志

太子太保大學士諡文襄舒公墓志銘

乾隆丁酉正月

孝聖憲皇后賓天四月

上奉

梓宮安葬

泰東陵大學士舒公扈 蹕以行十九日抵良格莊遭疾

上命醫診治且令公弟侍衛舒臨自都乘遽以來侍疾未至

二十一日公薨

上諭曰大學士舒赫德老成端重練達有為御極之初卽膺

任使宣猷中外四十餘年前此平定回城懋著勞績嗣於西陲撫輯歸順遠番東省勦捕悖逆匪眾悉心籌畫動合機宜實爲國家得力大臣自簡任綸扉日直內廷兼綜部務勤勞匪懈倚毗良深茲聞溘逝深爲震悼隨賞給陀羅被遣額駙公福隆安帶領侍衛十員往奠茶酒竝著晉封太保入祀賢良祠其任內革職降級之案概予開復所有應得卹典仍著該部察例具奏嗣

上還京親臨奠醑復御製詩章以志哀悼既而禮臣議上賜祭賜葬如例諡曰文襄公長子今倉場侍郎舒常以參贊大臣統兵征勦金川事薦留駐四川及是又命馳驛回京治喪於是典禮具舉哀榮備至將以五月十九日葬於望涇先塋而侍郎君具狀來丐爲隧道之銘按狀公少而岐嶷

端敏雍正戊申年十九由監生考試筆帖式引見

世宗憲皇帝改授內閣中書庚戌入南書房隨大學士預辦機密壬子擢內閣侍讀偕鄂文端公爾泰往甘肅經理軍務乙卯擢監察御史

今上二年丁巳擢內閣侍讀學士戊午擢都察院左副都御史是年冬擢兵部侍郎協辦步軍統領庚申

上以盛京國家豐鎬游民聚處日繁非便命公偕將軍暨五部諸臣議奏公請禁海口毋許山東游民私渡先來者編入戶冊以備約束又往例民人開墾荒地十年始升科納賦而旂人限以三年輕重失序請更其例奏入允行丁卯調戶部侍郎戊辰擢都統兼署兵部侍郎三月恭遇

孝賢皇后大事命辦喪儀九月奉旨爲軍機大臣十月

擢兵部尚書十一月調戶部尚書管三庫事十二月 命同  
大學士經畧傅公恒征勦金川參贊軍務乙巳三月金川納  
款奉 旨優敘加太子太保 御書均式宣猷四字賜之尋  
命由川入滇勘視金沙江形勢以籌銅運又 命歸途校  
閱湖南北營伍十二月還京庚午 命視浙江海塘工程辛  
未從 幸江南浙江癸酉張家馬路潰決黃河直入洪澤中  
斷流者數百里  
上命公同劉文正公統勳策公楞往治之堵決口恤災黎月  
餘事畢

上嘉之先是準噶爾有綽羅斯都爾伯特和碩特土爾扈特  
名四衛拉特其輝特部附於都爾伯特厥後土爾扈特竄入  
俄羅斯乃以輝特補之傳至噶爾丹跳跟犯塞

聖祖三臨朔漠大殄羣醜凶渠走死迄噶爾丹策凌

世祖憲皇帝遣使經界其地始奉約束及喇嘛達爾札戕其  
酋自立所屬散亂而輝特台吉阿睦爾撒納爲達瓦齊畫計  
假哈薩克兵襲喇嘛達爾札殺之達瓦齊自立爲汗阿睦爾  
撒納遂率所屬及都爾伯特台吉策凌叩關求附且籲借兵  
以定準噶爾地

上先命公廉之得其狀而返至是 命公馳往經理公以阿  
睦爾撒納新附難信請不與兵而移其妻子就食歸化城  
上以請兵不與是疑其貳也移妻子是以爲質也軍營兵力  
未齊兩部降衆不下數萬疑而有變事將不可問所辦非是  
落公職以閒散在參贊上行走明年乙亥將軍哈公達哈率  
兵進發公奉 旨留烏里雅蘇臺偕侍郎兆公惠等籌辦糧

餉駝馬接濟事宜是年伊犁平分準噶爾地四衛拉特各自  
爲汗駐將軍於伊犁統兵鎮撫之而令各汗入京師錫宴阿  
睦爾撒納旣不得爲總汗且以將入京疑懼因煽其衆中道  
叛走時其妻子尚在烏里雅蘇臺游牧公聞信偕兆公馳往  
收其妻子送京師丙子噶爾喀台吉青衮雜卜叛臺站卡倫  
皆斷會有察哈爾兵數百名方以送羊至公留之分布各站  
軍報乃通又以所獲馬數百匹羊萬餘頭冒阿爾泰雪山運  
赴軍前比至額爾齊斯河哈公兵已絕糧四日矣未幾 詔  
令入 覲授鑲黃旗漢軍都統參贊大臣丁丑春同將軍成  
袞札布等由珠爾斯進兵回部適所收之準噶爾夷人沙  
拉斯胡瑪斯叛副都統鄂實等陣亡公坐是復革職以兵丁  
効力贖罪公同兆公取阿克蘇下烏什得 旨令公在阿克

蘇料理回人屯種而兆公等以是冬督兵進取葉爾羌賊度  
官兵深入無繼悉衆以困我軍阿克蘇烏什亦一日數驚時  
回人玉素富自其祖內附封公居哈密久隨征在阿克蘇公  
廉其可信屬以安輯烏什回人而身居阿克蘇鎮之衆心大  
定會

上先遣滿洲蒙古兵四千爲駐伊犁用公檄令速赴阿克蘇  
十一月兵至者二千餘名公帥以先道險遠馬斃往往步行  
戊寅正月初六日將抵葉爾羌回酋大小和卓木逆戰公督  
兵奮擊凡八晝夜賊敗遁乃與兆公兵合事聞  
上授爲副都統旋授吏部侍郎工部尚書鑲紅旗滿洲都統  
明年回部遂平

上加恩予世襲雲騎尉又繪象於紫光閣 親製贊詞云白

衣白水聞黑水信安衆進援爵秩重晉蓋謂是也庚辰命  
公駐回城定設官授祿賦稅土田之制冬賜紫禁城騎馬  
辛巳命尚書永公貴代公公還京調刑部尚書兼都統如  
故壬午正月管三庫事是年春南巡命在京總理事務後  
以爲常癸未四月兼署工部尚書充殿試讀卷官五月充  
經筵講官七月管戶部事十月加太子太保甲申春命  
偕裘文達公曰修赴福建審訊海關陋規七月署步軍統領  
十二月兼管國子監算學乙酉允國史館總裁官丙戌二  
月暫署陝甘總督七月兼署戶部尚書丁亥七月署步軍統  
領時緬甸不靖戊子春命以參贊大臣往雲南會陳奏錯  
謬革職以副都統銜赴烏什總理回疆事務辛卯夏土爾扈  
特來歸初土爾扈特汗阿玉奇投入俄羅斯居於額濟勒河

及阿玉奇曾孫渥巴錫以俄羅斯褻佛教又苦征調遂挈所  
部以來衆十餘萬羣言洵洵謂有詭計

上亦慮伊犁將軍伊勒圖一人不能經理命公往相度機  
宜公察其無他人奏

上嘉之額濟勒距伊犁萬有餘里渥巴錫自庚寅十月啓行  
八閱月始抵伊犁之沙拉伯勒界飢疲疾疫斃者枕藉公隨  
宜措置存活甚衆先令渥巴錫及其台吉入覲而分居部  
落於齊爾吉爾哈朗諸地又請先於伊犁所屬蒙古部落借  
駝馬牛羊數萬俾其字息而發尚都諸牧廠之牲畜以補之  
又予以地給以籽種撥屯兵教之耕植於是土爾扈特咸得  
安其生以爲歸天朝晚也已而俄羅斯邊吏使使問故公  
令見面折之使者搏頰惕息而去是年

上授爲伊犁將軍十一月授戶部尚書壬辰五月補領侍衛  
內大臣八月命爲武英殿大學士兼刑部尚書還京復充  
國史館及清字經館四庫全書館總裁又總理吏部兼管  
戶部三庫仍充經筵講官甲午掌翰林院事兼日講起  
居注官是年秋山東壽張縣逆賊王倫以邪教脅衆殺掠官  
吏民人

上遣公統率侍衛官兵以往至則破臨清盡殲其黨王倫自  
焚死凡六日賊平降旨嘉美從優儀敘授御前大臣  
命儒臣撰臨清紀畧以著其事丙申二月定西將軍阿公桂  
平金川

上以公運籌帷幄有功依平定準噶爾回部故事圖前後功  
臣各五十八人公名第四參贊君名第十稽諸往古如雲臺凌

烟未有一人而再登圖繪者至于父子竝列尤爲曠古所無  
時

上稽古右文徵天下秘書異牒條爲四庫藏弄文淵閣命  
公領閣事世以是益榮之公姓舒穆魯字伯容別字明亭正  
白旗滿洲人曾祖諱席爾泰理藩院員外郎祖諱徐元夢康  
熙癸丑進士由翰林院庶吉士歷官太子太傅戶部尚書協  
辦大學士謚文定考諱席格康熙丁酉副榜貢生以文定公  
公蔭補工部員外郎以公貴累封光祿大夫刑部尚書妣黃  
嘉氏繼妣宗室又繼妣棟鄂氏皆封贈一品太夫人公爲黃  
嘉太夫人所出生於康熙四十九年庚寅十二月初二日距  
薨之年六十有八初配富察氏繼配宗室子長舒常今官總  
督倉場侍郎次舒寧以事發往伊犁次舒安先卒孫三某某

某公夙夜在公不事家人生產惟宗室夫人勤儉莊敬以相厥家公薨夫人迎柩於道哀慟深切以五月二十一日卒兩夫人皆合葬於京師東直門外望涇之原昶先事公于軍機房繼又爲秋官之屬辱公知遇甚厚二十年來竊見公誠以居心勤以莅事勝繁肩鉅洪濟艱難根盤節錯世人望而氣阻公獨紆回籌畫鞠躬盡瘁俾於有成及其領閣部也甄綜庶政必躬必親以小心將事以明作圖功使百執事恪恭震動不敢稍有叢脞放廢所謂能任大事知無不爲者非歟公待諸昆弟雍睦無間言在家事贈公及兩太夫人起居必謹居喪哀而盡禮私而不廢公以家庭庸行之常故不著著其關於軍國大事者而系之以詞銘曰

維舒穆魯肇自渾春鍾祥良隅厥氣網緼允矣太傅行端德

醇名卿碩彥式昌厥門公實繼之如鳳如麟少年通籍簡於紫宸軍國重政輒以公掄金川之役伊犁之軍公在行間手闢禳氛時或利鈍一以忠肫降夷十萬駝馬千羣公往撫之若旭之溫弗驚弗駭服我耕屯潢池劇盜弄兵於原公往剷之若霆之奔毋冤毋濫奠我良氓泱泱我畧穆穆鴻勛何天之寵詔旨璘玢曷不慙遺箕尾云淪詔祀於祠升以精禋詔碑于隧冠以鴻文恩禮丕懋爲時宗臣功在典冊名在乾坤我銘幽窆用勗後昆

卹贈光祿寺少卿戶部主事趙君墓志銘

君諱文哲字升之一字璞庵江蘇上海縣人少以穎悟稱年十九補博士弟子爲工部侍郎夢公麟內閣學士李公因培所知因是于庠序益有聲乾隆壬午春



上幸江南進詩試行在賜舉人授內閣中書舍人癸未  
充方畧館纂修官甲申直軍機房大學士劉文正公統勲劉  
文定公綸今大學士于公敏中皆嗟異其才戊子秋侍講學  
士紀昀中書舍人徐步雲洩兩淮鹽運使盧見曾事君與余  
牽連得罪會兵部尚書阿公桂以定邊右副將軍總督雲南  
貴州請以余兩人掌書記詔許之明年三月至騰越州時  
大學士忠勇公傅公恒奉命經畧緬甸七月偕協辦大學  
士戶部尚書副將軍果毅阿公里袞由南大金江以西進討  
君從之出萬仞關掠猛拱抵老官屯緬地惡多瘴攻壘久之  
未克君乃以病還騰越州十一月緬降撤兵阿公里袞已前  
卒傅公還朝君始與余依阿公幕府居二年辛卯五月  
上以理藩院尚書溫公福代阿公會四川金川土舍索諾木

襲革布什咱土司戕之噉小金川土舍僧格桑攻鄂克什勢  
張甚總督弗能制九月命溫公偕阿公赴蜀討之奏以余  
與君行十月至成都復以君爲中書舍人明年壬辰五月余  
從阿公由章谷攻達烏君留溫公所是冬克美諾小金川平  
晉君戶部主事又從溫公由空喀進討金川又明年癸巳兵  
至木果木攻五閣月弗克六月小金川降者叛與金川合鈔  
後路初十日師潰賊邀於險溫公歿君與其難時年四十有  
九按故事無驗而死于兵名曰未出未出不得卹兵部員外  
郎巴君尼琿以君陣亡報事聞兵部乃議贈光祿寺少卿予  
祭葬工部作主躋于昭忠祠命翰林院立傳蔭子一入國子  
監讀書期滿以知縣用得旨於是其孤秉淵寓行狀來蜀  
且曰不孝將以明年二月奉衣冠歸葬於鄉先君執友惟丈

暨侍講吳丈最親已丐吳丈表於隧矣鑿石幽窆惟丈其無辭按狀君曾祖繼舊祖壁監生父紳歲貢生是生君兄弟三人君行二居家以友悌聞娶張氏子五秉淵長也監生次秉沖次學泗次醴源次學海女一適黃某孫二尚幼以某年月葬于某里之某原君子學于文無不通尤以詩詞名天下少幽介及壯機警敏慧善析人情寫物態爲人作進御奏記文字深淺輕重各愜所欲又捷且工以是游諸公間無不親愛者余與君同郡也弱冠同學同官于朝又以事同譴同從于軍也知君者莫余爲詳乃銘以遺之嗚呼君昔著婣雅堂詩詞皆屬余爲序道其所以工者備矣故不復云銘曰嗚呼古之葬者骨肉返于土也君獨不然飼烏鳶而飽狐兔也結蒲收髮怛孤嫠也嗚呼魂氣無不之也沂江而東乘雲

螭也厥兆燹龜神鬼馮也國瘳栖之莫敢或隳也

雲南迤東道錢君墓志銘

君名受穀字黃與一字冲齋浙江秀水人曾祖治祖槃皆不仕槃生炯嘉興縣監生以才名中年應順天鄉試授經於今大學士誠謀英勇阿公後病歿于京師以君貴三代皆封贈如君官君孤貧無以爲家隨母嚴太恭人依世父母以居錢文端公陳羣君宗老也勸之學君遂刻苦自勵補秀水縣學生沈編修昌宇督學廣東君往依之編修卒於任復從甘肅謝太守某於安徽轉至肅州逾二十年始歸里乾隆二十二年南巡君以賦上行在得召試賜舉人授內閣中書舍人時英勇公以參贊大臣入爲工部尚書而錢文端公子汝誠以戶部侍郎兼順天府尹方貴盛交口推君常熟蔣

文恪公溥遂延之賓館俾典書記後二年庚辰成進士改庶吉士明年散館授戶部主事兼筦錢法堂君通籍後廉介食貧茹素不異諸生居宣武門外距文恪公第十餘里徒步往來未嘗僦薄笨車也所居矮屋五六椽蘆簾土鏗與圖書間雜坐客無檀不惜也既爲曹郎精心吏治尚書兆公惠侍郎安公泰咸稱其勤能二十八年擢員外郎是時天津淀河水積日久淹及田廬兆公奉命治河以君從疏濬半年積水遂涸二十九年京察一等入直軍機處三十年擢郎中充湖南鄉試副考官三十二年擢陝西興漢道是時雲南徼外緬甸跳梁總督楊應琚弗能制

上命承恩毅勇公明瑞爲將軍兼總督討之 陛辭奏請從事 詔以戶部郎中馮光熊吏部員外郎傅顯河南開封道

諾穆親及君參其軍君被命由漢中馳入雲南氏永昌迤東道步調糧儲道九月明公督師自永昌發君從之出宛頂撫水邦大鞞蠻結破柵十六踰天生橋入象孔迷失道趨大山猛籠就糧賊躡之三十二年正月麋於蠻化賊來益衆事亟明公屬君護案牘先行遂歿於陣君同潰軍入關調迤西道明年七月定邊右副將軍偕經畧傅公恒復進兵奏君駐盩達接應糧運暨警報往來連月大雨君日夕在泥淖中凡五月而竣事師旋又留君於虎踞關監守關兵且收糧儲之在各站者又明年二月復署迤東道是時各關尚戒嚴而總督常駐永昌君亦綜理軍需局事年餘以積勞卒于官君生康熙五十四年某月日卒乾隆三十七年十月十一日年五十有八娶某氏子二昌祺昌壽君卒日篋無餘財總督率

其屬賻之乃得貲棺以斂而歸其喪於秀水君長身戍削疎  
髯而壯于頄望之蒼然若河朔人奔走四方習於勞勩故其  
居官也爬梳繁劇必盡其宜聲色嗜欲之誘一無可動而山  
川之險阻風雨之跋涉兵戈之間關轉輾怡然處之每日五  
更輒蹋壁背誦少時所習古文詩賦長篇不遺一字迄曉而  
止蓋君之不自暇逸如此君與余同 召試同直軍機房又  
先後從軍於滇故得君之詳無如余者余以四十一年四月  
自蜀還 朝而君之卒踰三年矣昌祺等將以某月日葬君  
於秀水縣某原狀來乞銘乃銘曰  
少貧而孤厥苦荼也長而經營四方厥顛魴也晚而從戎以  
大終也其廉吏其志士也矜此勞人信煩寃也

廣西柳州府通判朱君墓志銘

君姓朱氏諱秀文字炳齋先世居紹興後徙於杭祖諱國武  
又遷松江之婁縣遂占籍爲縣人考諱鎮藩不仕君讀書恥  
習章句旣冠補學宮弟子數試不售以貢入太學年五十循  
例出判柳州君之之官也上游初未之奇會獄有疑久不決  
君力請辦之由是知君才其後遇有難治者必以付君君因  
以少見其長歷攝隆安懷遠永淳三縣養利永康橫州三州  
事至則獄必平廢必舉有不可必力爭於上故民樂其來而  
悲其去君旣以暮年途仕而南粵外控絕徼徭獠雜處瘴雨  
蠻烟所在蒸結君以上游委任日奉檄馳箚莽中意不自得  
乃以捐升同知離任引年乞歸家居二十餘年教其子若孫  
咸有成立可謂難矣君生康熙丁丑八月二十有一日卒乾  
隆戊戌六月二十有三日年八十有二配夏氏有婦道先君

十有一年卒側室孫氏亦以勤儉能佐君君前遇 覃恩賜  
封其祖故兩世贈如君官妣鄔氏王氏贈安人君以子履吉  
官遇 覃恩引新例贈文林郎夏氏贈孺人孫氏封太孺人  
子四桐樟早殤夏孺人出履吉貴州鎮遠府施秉縣知縣履  
祥太學生俱孫太孺人出女子子三人適蔡士杞汪大經王  
錫奎孫七人光曜光璧光鼎光鼎光宁光邦光泰女孫五人  
余與君同郡而君女夫汪君又常從余游故知君宦跡爲詳  
君之沒也越二年庚子十月四日巳酉履吉履祥卜葬君于  
婁縣三保三區二十五畝北隣圩之新阡復介汪君以狀來  
請銘昔曾南豐謂南粵偏遠官者小其官爲不足事故皆傾  
搖懈弛不能滌陋俗而馭於治而唐荆川紀蔡克廉謂州佐  
操柄所不在其可見者大率緣俗而治不能有殊絕功德加

於細民蓋難於振奮如此今君旣不以遐方鄙陋少自摧挫  
亦不以冗員散職自安坐廢插齒牙矯尾角見其才而能使  
當路用其才在粵十年游攝六州縣事雖以年至自引去而  
功已有所加於民治已有所見於世然則操柄不在之說果  
可信耶世之傾搖懈弛自小其官者觀於君可以知奮矣因  
其孤之請系以銘曰

康寧壽考天所靳羸此縮彼理亦準八桂之林馭蠻蠢云何  
有才詘卿尹歸與故園耽大隱高朗令終弗替引子孫誥誥  
衆且允刻石於幽謝菝泯

誥封中憲大夫安徽和州州同知王君墓志銘

乾隆辛丑秋四川松茂道鳳儀遭其母陳太恭人之喪明年  
壬寅四月扶櫬歸里蓋上距其父中憲君之歿十有五年先

是鳳儀免父喪揀發四川由縣令陞成都府知府時王師進討金川軍事亟不可以假爲辭乃遣其弟耘東歸卜葬中憲君于太倉州東鄉蘆漕且乞余族兄光祿寺卿鳴盛銘於幽窆會葬亟未及刻石以藏於是將以某月日奉太恭人合葬於原而屬余爲志墓之文按中憲公諱述濬字雋驥號益江王氏自明大學士文肅公錫爵之弟諱鼎爵官河南督學副使無子而文肅公有子一爲編修諱衡編修亦子一爲太常寺少卿諱時敏皆不可出爲後及太常公生九子乃以次子順治乙丑進士贈戶部左侍郎諱揆爲學使公嗣曾孫是爲君曾祖祖諱原祁康熙庚戌進士戶部左侍郎父諱暮康熙丙戌進士都察院右副都御史廣東巡撫惟太倉王氏以右族稱天下科名爵秩遠有代緒迄今二百餘年君纘承前

業勵志刻苦性開敏九歲工屬文十五生母陳氏卒哀戚如成人請於嫡母孟夫人以命婦服殮夫人許之中丞不許君固請中丞曰兒勉之他日能樹立得以章服榮而母毋亟亟也君泣而對曰不敢忘由是益肆力於學雍正四年丙午中本省鄉試丁未會試中丞爲同考官君以迴避卷中續榜時命大臣揀選主者以公年少且世家子期以遠大故不入選尋中丞由少詹事出爲廣東布政使調直隸癸丑巡撫廣東君皆隨侍乾隆五年庚申冬中丞入京候旨壬戌得旨軍臺効力君念中丞逾七十不任塞上寒苦亟馳歸盡斥其產辦裝造發將侍中丞出塞未至中丞已首塗行四程蒙恩賜環君亦於是日至遂奉以歸君家世儒素中丞官轍數徙無長物及罷官寓京師三載又值淮徐歲祲請捐萬金

以助賑君典餽稱貸心力爲竭中丞家居十餘年 恩給三品銜至八十六乃終君左右就養食必備甘脆已則厭其粗糲者將授衣貂貉以時具而身往往衷麤布惟恐中丞聞之歲時伏臘張筵奏樂中丞藉以陶寫不知其家實屢空也九試禮部不第甲戌入都候選歲將除計旬月當選及忽治裝欲歸人怪之君曰吾怵怵焉寢不能帖席其可久於此遂以元旦次日行塗中得家書中丞果有疾至家七日中丞始歿未至前一夕中丞忽謂侍者曰若知之乎吾兒行且歸矣厥明果至人以爲純孝所感戊寅服闋選安徽和州州同知己卯蝗蝻生君揮汗走赤日中率吏民撲捕復禱於神頃之蝗隕如雨廣袤數里害遂息壬午權州事兼攝含山令甲申大水君謁前太守請發社倉穀借諸民太守欲俟牒到君固請

先發如有譴願獨任之旣獲請正斗筲飭量人毋以凶上下手民大悅江濱窪下田恃隄爲蓄洩嘗夜過赤林壩值上流汎溢隄將潰民見君叩請修護君率輿隸伐木起工爲倡民益奮比明工成隄得以無恙上官檄君理賑務君履勘不少假或謂何不概以五分例五分不成災君曰輕重何可混乃審定八九十分以報繼以賑戶過多將議減君力持不可有不逮賑者捐俸卹之江浦民寓於和者太守欲令歸江浦食賑江浦復請歸和持不決君請移江浦賑銀至和給之民無勤而得食是役也勞瘁十閱月竣事民尸祝之乙酉又兼攝守令含山方借 國帑修隄日鳩千百人目營指畫用不虛靡猾胥罔敢染指州田有江埂歲須畚築而舊籍多混公議按田數以派埂段令民各書榜爲識更造印冊按籍督修庶

杜混弊事未果行識者惜之丁亥州又被潦君佐荒政如故  
戊子奉檄發賑慮民守候黎明卽起料檢日午始飯是日已  
詣賑所忽中寒嘔噦歸三日而卒嗚呼和州瀕於大江君在  
任凡十餘年無歲不有水患否則修隄築堰日在泥塗畚鍤  
中君不以閒曹冗員稍自闕茸辛勤嘔咻至久而益勵卒以  
此得疾可謂能勤其職者矣蓋君自以奕世忠孝念國恩  
守庭訓常欲激昂奮勵以紹祖父志不幸老於州佐故不能  
盡其才以攄其効然君旣歿而松茂馳驅絕徼能以功名自  
見受

天子特達之知兩邀綸綍之寵則君之志雖不及施於身  
亦可無憾於九原矣君初封中憲大夫四川成都府知府再  
封四川松茂道配陳氏康熙己卯舉人海鹽工部虞衡司主  
事邦懷女先封安人晉封太恭人少有賢行初來歸卽遭姑  
孟太夫人喪朝夕悲慕擗擋盡禮中丞嘉之在保定時委以  
中饋酒漿編紵內外周洽井井如也中丞罷鎮出塞以暨歸  
里其間堵持門戶潔治滌澹太恭人仗助之力爲多及松茂  
佐總督幕府時奔走塞外太恭人誠以盡心無懈聞者尤以  
爲賢中憲君生某年月日距卒於乾隆戊子某月日年六十  
有八太恭人生於康熙某年月日距辛丑某月日年七十九  
子八長卽鳳儀次宣次宜次鳳翥次鳳超次宇次審次寵女  
八皆適士族孫十人余家距太倉百里而近文肅公以下家  
門之華靡文章政事之盛輒能歷歷數之然未嘗以世譜相  
質也及余從軍兩金川始識松茂於軍次其後時相過從因  
得稔中憲君之孝於親勤勞於職事與夫太恭人之賢及余



還 朝而松茂弟宜適在都下時時至余家迨余出按江西宜在屬下得以非時見益知其家事爲詳然則非予孰當銘者銘曰

具區之瀾實環婁東沖融碧澥浴日迴風是啓太原其光星虹文章德業旣遂彌隆君繼厥後曰孝曰忠胡屯一第弗遺於豐曠就一官乃丁鞠誦誰憂昏墊固以坊庸誰呼庚癸飽以殮饗爰咨爰庶勉德勉功勞臣志士冗散以終匪報之斬惟後之崇我斲此銘用竢幽宮

湖北布政使朱君墓志銘

湖北布政使朱君一蜚素以政事才幹見稱於世君世家松江繼遷浙江之嘉善於松江百里而近故立身爲政之方余得備知其厓畧及余以布政使雲南其子錦昌已爲騰越州

知州曉暢邊事識見英敏人謂君之遺教也故知君行事益詳乾隆五十六年八月錦昌以書來京師曰某無似先公尚在淺土而先母又不幸歿矣將奔喪歸而合葬焉敢以志墓之文爲請按狀君少敏慧年十五補縣學生卽以能文名浙右入太學名益著會準噶爾逆命用宗人府丞蔡公嵩薦名見賜金 命往陝西軍前効用綏遠大將軍岳鍾琪使赴鄂爾多斯查檢糗糧器械刻期出師往返四旬而事畢將軍深異之自是任陝西之高陵麟游韓城臨潼縣事者四又任直隸之東明臨榆安肅者三任直隸霸州遵化知州者二由保定府陞清河道任山西直隸湖北布政使者三所至皆有政績人至今稱之在高陵也遇旱走五十里至驪山龍潭禱雨雨立降歲以大熟麟游小邑戶不滿萬奉檄令民運糧力

請得免其半在韓城歲災首出俸錢措紳從之得銀九千兩赴河南糴米減價以糶周而復始銀盡乃止災不爲害其閒修學宮講鄉約嚴保甲社倉義學莫不舉行在臨潼清稅賦葺橫渠書院新之及署霸州掘井千餘以救亢旱爲保定府建版牖以興水利高公斌蔣公炳皆推重焉而於斷疑獄捕劇盜尤長麟游有自經於質庫前者君往驗指尖黑兩手掌青舐之得銅氣君謂是博而負者訊之乃同賭人先與質庫詬詈有隙適死者負多計無所出因愆之死以詐質庫於是得白衆驚爲神明潼商道經臨潼被竊盡失其貲時君在省道令歸而驗之君故以他事辭怒將劾君則君已使捕役伺諸質庫賊偵事緩以其貨往伺者遂盡獲之東明盜藪河南劉某爲之魁君廉捕役俞某能給以厚賞先獲其黨殷二曹

之使禽劉以自贖民忠遂除其機警捷速皆此類也君旣出道升布政使感激 聖恩不次超擢地方利弊無不設誠而力行之山西山多田少南藉秦豫北資歸化城餘粟商販不至民常食貴君念積貯以常平爲重晉省倉穀例貯二百七十三萬有餘而是時缺額八十五萬三千四百餘石向議以監生入穀補之穀貴收穀二年不及十之二請仿江南減二收捐之例得 旨於是民踴躍捐輸倉儲始足值錢貴取庫存錢配放兵餉又發商領賣錢是以流通歸化城在長城外民人命盜向令副將同知勘驗復由朔平府審轉君謂勘驗一官承審又一官何以得實請卽令副將同知審轉民始無枉縱株累者君骨格開張精神振奮擿奸發伏動中窾要案牘如山窮日夜讞決不以繁瑣爲嫌在州縣久洞悉情弊奸

胥猾吏不敢上下其手獄有冤濫必請於主獄者全活往往至百十人性剛直是非可否斷然不可易臨以上官環以大衆絕無依回洩忍由是忌者思有以中之調湖北布政使旋以在山西用非其人被議落職得薄譴籍家之日自祖遺田十二頃外無少增益然後益知君之廉罷官後主潞安府起文書院山長又一年而卒卒以乾隆二十年六月二十七日距生康熙四十一年閏六月十一日年五十有四君字健冲諱某者高祖諱之榮者曾祖也康熙丙子舉人諱岸登者其考也子三長錫昌監生出爲兄後次卽錦昌次誌昌又次鉞昌孫二人某某配魏氏明給事中贈太常寺卿大中元孫女庶吉士學濂曾孫女仁孝儉恕讀書能詩識大義後君二十四年而卒例封夫人以乾隆五十七年某月某日葬於某縣

之某原銘曰

督姦飭法以息嘖呻謂君明察孰知其仁口講指畫以悉利病謂君敏練孰知其正位不償德德不永年天實靳之俾昌後賢隆隆幽竊山盤水繞偕茲藿蕝永綏厥兆

春融堂集卷五十三終

春融堂集卷五十四

青浦 王 利 德甫

志銘

甘肅涼莊道署四川按察使司顧君墓志銘

嘉慶二年閏六月二十六日署四川按察使司顧君卒於家  
 時長子永之在河南會以川楚寇警軍務方亟久之乃得奔  
 喪於是先使其弟湛之來告曰吾兄將歸葬府君於瀆門山  
 之龜頭渚敢以墓志為請嗚呼余自乾隆二十三年與君定  
 交京師中間離合不一迄于今蓋四十餘年知君生平莫有  
 如余詳者志何忍辭按行述君名光旭字華陽一字晴沙其  
 先本于吳丞相雍至迥判潤之始遷無錫及明廣東按察使  
 可久洞陽公始大曾祖敦進士祖懋父建元三代皆以君貴

看齋堂集卷五十四  
封贈如其官君少穎悟喜獨居靜坐時有所得乾隆十七年  
年二十一爲邑諸生明年二月壬申 恩科鄉試中式八月  
會試成進士以戶部額外主事用三年實授山東司司主鹽  
筴兩淮解引課銀庫輒謂不足庫平每百兩挂欠短平銀十  
五兩歷十餘年欠益多君謂天下所頒之平皆由戶部較準  
而發若兩淮任意短少何以歷任皆然若由銀庫指爲挂欠  
卽屬多索白諸堂官衆不能決獨富文忠公躡之遂銷其欠  
尋擢員外郎二十四年保御史授浙江道監察御史是年直  
隸山東大水明年正月君上奏曰上年兩省被災荷 恩截  
漕發帑已賑加賑如天之仁無微弗至近見流民扶老挈幼  
什百入京春來尤甚故五城米廠飯廠人數倍增詢之是近  
京數百里內被災之民相率逃荒先之毀屋伐樹繼以賣男

鬻女飢羸老弱踣頓不可勝記耳目所及如此其外可知伏  
思救荒無奇策惟督撫及有司親民之官實心實力方克有  
濟乃各州縣未嘗不設廠未嘗不施賑而或委任於佐貳假  
手於吏胥所設廠或遠離村鎮窮民奔走待食或得或不得  
凍餒顛斃皆所不免 國家良法美意一入俗吏之手民沾  
實惠者十不及五卽有一二賢能有司撫循周至而他境流  
民間風畢集日聚日多轉難措手此督撫不能真實愛民下  
亦以應付塞責一切皆屬 乞請 敕下督撫分飭有司  
隨地撫綏毋致流多 乞請 敕下督撫分飭有司  
導竝可以工代賑然後借給牛具籽種以資耕作倘仍因循  
侵蝕有流民有曠地卽重 乞請 撫州縣之罪至京城外來飢  
民已獲赴廠領賑但一年之計 在東作其無力自回者給

貲遣送其本藉全無倚賴不能回藉卽歸大興宛平作何安輯不致栖流無著并請 敕順天府尹會同五城御史查明人數請 旨遵行抑臣更有請者外省遇有水旱司道府親臨查勘州縣先以伺候供應爲能所委佐貳亦以公館酒席更滋擾累請嗣後大員親臨災地州縣毋許供應亦不得帶同佐貳多攜人役致累災區倘有違者嚴參重處似於荒政亦有裨益奏入

上善之二月 命赴京畿查勘君至文安大城疏積水撫飢民入樂亭境民數萬擁縣門欲斃知縣及悍役王姓者時己昏黑公令老者數人前宣示

上恩特遣御史四路勘災以活爾等性命言至痛切衆哭君亦哭乃令姑退以俟軫卹而乘夜炳燭起草馳章入告乞加賑次至寶坻灤州盧龍皆如之四月勘畢復 命召見嘉許良久旋 命赴通州坐糧廳任三十二年擢工科給事中三十三年二月授寧夏府知府明年調平涼三十五年廿肅大旱君請開賑而布政使謂有名無實不許君獨清查災戶先發銀米適布政使以憂去署任爲今直隸總督胡君季堂君抵省胡君迎謂曰輪蹄鳥道羊腸路溝壑鳩形鵠面人賢二千石涕泣多矣蓋君口占詩句爲人傳誦而布政使聞之也按察使畢君沅見君青嵐山詩產破妻孥賤腸枯草木甘歎曰一字一淚十字千古矣是時隴坂災黎鬻妻子裝木籠于驢背每籠兩人君命城門記其數五閱月共出六萬七千餘人則他郡可見也臯蘭各縣聞平涼設粥廠相率就食日以萬計自上年五月雨至三十六年三月始雨總督明山巡邊

至隆德告君路有饑死者君率縣令請罪總督曰百姓道斃於太守何與君曰知府任地方責烏得辭罪且總督見者一知府見者十知縣見者百鄉長保正見者以千數矣曩知府於路見羣鴉飛鳴樹枝牽挂縷絡則人腐敗之賜也跡而求之澗谷中齒骸堆積綿延不絕是皆地方之責烏得無罪總督悚然感然問如何而可君曰平涼隆德固原靜寧各有二粥廠飢民日增每廠多至四五萬人天漸熱疫將起知府已遣人民住址大小口細冊此時不令歸農秋成何望願給兩月口糧爲歸農資俾得及時布種總督首肯乃具薄笨車數百兩陸續送歸其地時已陞涼莊兵備道而總督以罪免文公綬代之未至先用六百里書約籌災務既見文公曰河東一路請君任之君曰河東道里遼濶倉庫空虛官吏非本屬

恐呼應不靈未敢任也公曰一切錢糧惟君支取自府以下惟君調遣某帥以聽誰敢犯子君爲治素有聲旣奉檄罔不響應遂分八路比戶清查用連三票填注極貧次貧大小口數一付領賑者持票領賑一貼災戶門首一存本官核對未領之案晝夜抽查發奸摘伏官吏惕息暨於訖事無敢絲毫中飽蓋數十年所未有者及秋大熟甘肅民遂以生全時大兵方討金川土司三十七年文公調任四川總督將偕君行先奏請加按察使銜君聞不可曰是奏毋乃要君 國家有事臣子宜効力何以加銜爲總督歎息乃削其藁七月抵成都時前總督方以誤餉罷君力謀餽遺三路軍營賴以無乏十二月署按察使先是四川有失業無賴之民好拳勇嗜飲博掠惡少年爲從四出劫殺衆莫能制名爲咽魯子至是益

甚君督役搜捕獲之則責以大杖荷以重校反覆喻之以理咸股慄誓改悔乃令率其侶爲運丁無不踴躍爭先者軍米因以益裕君常謂天下無飢民無游民則揭竿篝火之盜斷無從生識者以爲名言時雲南布政使李君湖來蜀協辦軍需稱之曰江以南有數人物也四十年以秋審失出五案革職留川總理糧餉四十一年正月兩金川平大軍奏凱總督令馳駐西路臥龍關料理回兵兵十餘萬抵關震君威名無有叫喚需索者時二月風雪如嚴冬君積勞冒寒忽四體麻木醫治月餘弗效遂告病奉 旨准其回籍乃以七月放舟過嘉陵江宿坡仙樓士大夫爲君立生祠於樓上君有詩云密雲不雨下西川身上東吳萬里船多謝漢嘉諸父老不能載酒侍坡仙蓋其標韻如此既歸年方四十六封君及太夫

人同年六十八而諸子皆得孫君夫婦率子孫畚耨鞠歷上大父母壽進膳承歡晨夕弗懈與與緝緝如也四十二年冬丁外艱又十六年而太夫人歿喪祭盡哀及葬號泣奔走且廬於墓不以五十不致毀稍自寬假又建洞陽公祠並於祠旁起屋祀始祖及始遷祖與後之以文章名位著者示敬宗收族之誼又取洞陽公廢園所存丈人峯輦寘於祠作拜石山房謂先澤所存弗敢遺也又好葺前賢遺蹟在四川重建漢文翁講堂石室草堂爲杜少陵故址錦江書院在其右君改爲少陵書院并奉其像居家修邵文莊公祠築君子堂又求其墓而識之以歲時祭掃焉生平讓夷急病見義必爲五十年無錫旱君徒跣詣惠山真武廟禱雨其冬捐已田租并捐書院束修助煮賑又經理崇安寺粥廠躬親巡視明年又



捐束修以助展賑書院諸生貧者月給銀米爲助能會每冬  
月製寒衣以施爲禦寒會其焦勞經畫與甘肅辦災不殊無  
錫自楊文靖公得理學之宗顧端文公依白鹿洞規條建東  
林書院高忠憲公攀龍借吏部華允誠等爲之左右天下歸  
依嚮往如五緯麗天芒寒色正明季節義之士咸出其中而  
年遠教衰君以清裁令望爲世所推請主書院前後幾十餘  
年日與生徒講論道義以踐顧高之緒院中依庸堂下產靈  
芝五色嘉善曹徵君庭棟繪爲圖以紀瑞君爲人祥和醇厚  
澹于榮利其色莊其言厲難以吏治見稱而志在扶植忠義  
主持風雅金川木果木之變文臣殉難者二十六人 卹典  
下君度地於成都建慰忠祠作主以祀屬余撰碑記而自書  
之以鐫於石治事暇借今左都御史學政吳君省欽前湖北

巡撫兵備道查君禮及潼川知府沈君清任邛州知州楊君  
潮觀曹君焜輒從容讌集賦詩飲酒以爲樂著有響泉  
等集共若干卷又以無錫東南文藪而賢人淑士湮沒未盡  
彰網羅詩什人各系以傳成梁溪詩鈔四十八卷書法出入  
蘭亭聖教尤爲人所寶貴君卒年六十有七配華氏封恭人  
子三長卽承之乾隆四十二年舉人今官河南陽武縣知縣  
次卽湛之監生次葆之貢生女三長適同縣監生王相英次  
適平湖舉人張誠次適太倉舉人畢憲曾孫八籌築庠生筠  
節箴箎簡籥尚幼曾孫一人以某年某月某日葬於鼇頭渚  
蓋君自築之生曠也君歸里後十餘年余亦蒙 恩致仕其  
間屢過惠山相見君所以敦勉期望者益重蓋始以文字交  
而終以道義也昔蘇文忠公撰富鄭公神道碑曾文定撰趙

清獻越州挾菑記庸以示天下傳後世其敘荒政率辭繁而不殺今余亦猶是志也故詳載其大而餘從畧焉併繫以銘  
曰  
執徐之秋君來東振手相視和而充面晬背盜道積躬謂宜上壽期頤同何哉惡耗遽告終生平之志孝與忠一夫不獲心憂忡直臣循吏兼儒宗溢爲著作光熊熊端文忠憲其遺蹤一堂五世福亦崇允矣端坐還璇穹龜頭吉兆君親封山環水禎神靈鍾斑然狸首綬幽宮我斲斯銘颺仁風示萬子孫無終窮

廣西巡撫孫君墓誌銘

我國家撫有方夏薄海內外悉主悉臣覃及西南絕徼莫不奉琛錫貢至其君越萬餘里親赴闕廷鞠脛上壽幸備

期門羽林之末者莫如安南阮惠而廣西巡撫孫君敷揚威德實有以致之蓋安南諸大校莫黎鄭阮諸姓相吞噬久矣先是黎氏殘莫氏而據其國其臣鄭檢尋篡奪阮惠誅鄭并逐黎氏乾隆五十二年黎維祁攸關求內附孫君方奏聞而總督遽請出師踰三江挾維祁至於黎城會春正總督不設備惠悉衆至維祁駭竄官軍隨之入鎮南關時高宗純皇帝已遣福公康安總督兩粵將議討君密陳曰黎阮相吞噬外夷之常非敢抗大兵也今維祁不能守其城寇至相率而潰其不足以自立明矣豈宜進討以助之且自鎮南關抵其巢沿瘴海崎嶇瘴癘兵必損粵民久不知兵騷擾徵發必又損于民間安南深懾天威可以折箠使也福勇公然之阮惠果悔罪自陳乞効職貢并請封先遣其從子

光顯入 朝明年恭遇

高宗八十萬壽又入覲既至請用中國冠服

上益嘉之賜名光平禮成而還西裔番王蠻長咤謂是千古所未有也君名永清字宏圖別字春臺少而敏慧受書輒成誦年二十二爲諸生入廣東布政使胡君文伯幕值土司以爭廕襲相訐告驗之皆明時印璽總督將擬以私遣符信比叛逆律當斬株連者衆君先私具稿見胡君曰土酋意在承襲無他志豈宜妄以叛逆坐之胡君曰是督撫意且限迫安能倉卒易稿君乃出所具示胡君胡君讀竟大喜陳于督撫從之得活者二百餘人蓋少時固已奇偉矣及從廣東歸兩應 南巡召試皆列二等三十三年戊子順天鄉試舉人明年會試取授內閣中書旋入直軍機房撰擬悉當大學士劉

文正公于文襄公倚如左右手三十八年遷內閣侍讀充方畧館纂修提調官又充 文淵閣校理四庫館纂修官 鑾

輅時巡恒在扈從常以要事騎而馳

上遙識之曰此軍機處孫某也馳驟若是孰謂南人止能坐船耶四十四年擢江西道監察御史明年四月遂晉右副都御史不次之擢蓋異數也是年八月授貴州布政使龍里令某殘酷劾去之大定府胥役劉某黠悍杖斃之闔境肅然五年入覲 召對稱 旨旋有巡撫廣西之 命既至劾屬吏之糾結舞弊號十惡者削職治罪以示於衆廣東饑開常平倉停採買米價大平廣東人賴以全活奉 旨嘉獎謂深知大體有古大臣風 御製詩以志之融縣四頂山舊產鉛至是或言歲久砂薄君訪知煤少非鉛少也聞附近羅城縣有

長安官山煤廠旺移砂就之於是鉛額如故五十二年臺灣  
林爽文反調廣西兵合勦君往駐梧州擇勇銳者勞遣之士  
氣騰湧臺灣平福公謂是役也得廣西鎗兵之力爲多又慮  
梧州地界兩省餘賊或從此竄訶之果獲陳興遠等西寧民  
仇德廣邀衆結盟行劫捕獲之廣東官吏將窮治起大獄君  
曰結盟行劫有律在奚事株連爲其寬嚴平允又如此然自  
安南事起籌糧餉庀夫馬督運輜重鉛藥往來瘴地者兩年  
心力瘁而受病深矣病亟口授遺奏名諸子勉以讀書承志  
語不及私而卒君性仁厚篤於兄弟惠及宗黨工詩文少時  
爲江蘇學政李公因培所器在京師與陸副憲錫熊注編  
修學金爲詩文友著寶嚴齋詩八卷皆和平廉直之音君生  
於雍正十年七月二十一日卒以乾隆五十五年五月二十

日年五十有七始祖自丹陽遷無錫六世祖繼臯萬歷甲戌  
第一甲第一名進士官吏部侍郎歿贈禮部尚書尚書孫仁  
溥是爲曾祖祖岱正父廷鏞官山東德州州同三代咸以君  
顯贈資政大夫先娶華氏早卒繼娶顧氏以仁孝稱治家惠  
而有法先君五年卒子五長爾琦先歿次爾準舉人方以博  
學工詩詞名於時次爾琢次齡候補國子監典簿次爾曾  
尚幼女一適太學生華亮孫三慧詩慧淳慧翼以嘉慶五年  
四月二十七日合葬於金匱縣北胡埭之新阡爾準實來請  
銘方予自四川歸以鴻臚寺卿與君同直軍機又四年予由  
左副都御史按察江西君實補其缺故予二人相得爲最深  
初四十二年雲南總督奏緬甸有人貢之信  
上命阿文成公莅其事奏以君從旣抵滇貢不卽至

上召公還君曰緬夷震讐已久因前畱守備蘇爾相恐罪重不能自決若警切開導必無不至者公屬君作檄諭之未幾蘇爾相果還而其後按年入貢與安南同蓋君明遠畧熟邊務識夷情洞燭機宜所籌必當其才識有過人者非獨安南一事爲然故牽綴書之以示來裔其他政績甚著不復具書銘曰

治亂持危取昧侮亡國有常經

帝持其綱胡爲夸毗以缺斧斨維相尸之維君匡之止戈爲武來享來王吁嗟星象忽隕南荒契龜食墨其歸其藏後有墮淚弔此崇岡

四川鹽茶道王君墓志銘

余族弟南明之仕于蜀也四十一年而在軍需局者二十有

七年蓋本朝之制各省用兵則總督巡撫必設軍需局主以布政使選道府州縣之明練者預焉凡兵將之徵發糧餉之購貯器械硝藥之製造牛馬之轉輸道途之修治銅鐵布帛之備用將軍大臣之往來閑員佐職之選調皆主局者先爲儲侍指示羽檄倉卒朝夕數變亦或勝負得失所關足以驚心動魄故非熟練而有識明幹而有守不足與於此蜀自乾隆三十一年緬甸不靖大軍進討始調川兵又令覓雇驟馬以協馱載至三十四年大小兩金川侵擾鄰境用兵垂六七年迄四十一年而後奏凱尋有科爾喀之役繼又有貴州湖南苗民逆命而湖北白蓮教蔓延陝西以及於蜀故蜀之軍需局歷久而不能撤其間任事者先後升調或緣他故去惟南明一身樁柱其間勾稽案牘料量機宜先事億度從

無絰誤二十餘年中心力蓋盡于是矣南明由監生循例報捐二十五年八月補大竹縣丞越二年調補屏山縣丞三十一年委辦楠木是年六月委駐威寧解送赴滇官兵並催解牛馬三十三年辦天壇望燈杆木三十五六兩年復辦楠木三十七年陞成都縣知縣三十九年陞簡州知州四十四年陞瀘州知州四十七年陞成都府知府五十二年補授川東道五十五年署布政使年調全省鹽茶道年署按察使南明之採木三次也率吏役數千指入蠻地數千里涉巖峭觸瘴癘所獲皆巨材稱上意命加二級給賞緞疋及西藏用兵成都將軍率兵進總督駐打箭爐籌糧運而積糧未運至五六萬總督窘蹙召南明乃議檄明正土司曉以大義土司頭目悉踴躍牛馬屬

至不旬日糧悉起運事聞奉旨嘉獎賜以花翎南明雖屢擢收守大吏因其諳練局中藉以為重急則使之隨營辦事送兵督運緩則歸局總理一切無從容閑暇之日而南明亦以孤寒受

上知奮身不顧故卒勞瘁歿於官南明名啓焜又字東白號秋汀始遷祖富一公為蘆瀝場鹽官繼為白牛蕩書院山長故居楓涇涇北為江蘇婁縣境南為浙江嘉善縣境遂為嘉善縣人曾祖錫旦候選州同知祖宏澤附貢生本生父桓父象升皆監生累贈奉直大夫晉贈中憲大夫如其官祖妣妣及配胡氏皆贈恭人子三望福建經歷次均皆先歿次登輝議敘州同孫三長重鈞候選主簿次鍾鈞候選縣丞又次製錦尚幼女三長適舉人謝昌鑒次許謝某亦先歿三適監生

莊變南明卒以嘉慶三年十月初七日距生於雍正八年四月十二日得年六十有九以五年正月某日偕恭人葬於婁縣秋涇濱之新阡承重孫重鈞等請爲墓志南明與余同出於太原歲久譜軼失其世次而其家楓涇及余家青浦之珠街雖兩省相距僅三十里自少以兄事余南明受業於海寧陳先生焜而余鄉試又出先生本房時令如臯余與南明常在官舍以是益親南明少時長身玉立舉止閑雅時有謝景滌張思曼之目能詩集句最工書仿董華亭蜀中人弄爲墨寶簿書冗雜不忘風雅修杜少陵祠于草堂寺之側又築萍廬於署中及在夔州有三白鶴竝下之異築三鶴堂同人多以詩詠其事時詩人宦于蜀者顧君光旭爲按察使查君禮王君鳳儀先後爲松茂道楊君潮觀曹君焜先後爲知州吳侍講省欽爲學政每有讌集必招南明往互相吟和又自寫載酒凌雲冊以志雅尚三十六年十二月予過郫夜已三鼓矣宿其官齋殘燭熒熒然猶出梁侍講同書所書賢首經摩挲歎息蓋其清超絕俗如此年六十後使人歸稍葺其故居又建家祠于涇西置義田五百畝以贍族人將爲歸老之計其泪沒於軍需中如蠶作繭不能自出豈其志所樂哉重鈞等生晚不及知予故掇而書之其亦可感也已銘曰  
生山水鄉弗克居也宦山水地弗克娛也軍書旁午手口堵也勞人草草卒病以殂也若堂若斧雲波縈紆歸厥幽墟庶神之愉也

禮部員外郎前四川按察使司孫君墓誌銘

嗚呼是爲禮部員外郎前四川按察使孫君之墓君名嘉樂

字令宜浙江錢唐人高祖某曾祖某祖陳典雍正己酉科鄉試第一歷官陝西鹽驛道父孝培因疾不仕三代皆以君貴封通議大夫如其官君生而敏慧六歲就外傳同學生有誦堯典者聽之卽能成誦塾師驚異以爲不凡乾隆二十年補諸生己卯舉于鄉辛巳成進士分戶部福建司學習專辦井田科井田主旗地時旗田私賣日久輾轉相售糾紛舛錯方命大臣往勘分別回贖文牒棼然見者望而斂手君獨勾稽故籍窮源溯委由分得合并然秩然咸有端緒尚書于文襄公及少司農錢公汝誠異其材倚以爲重二十九年丁內艱旋丁外艱三十三年服闋補山東司主事三十五年陞廣東司員外明年京察一等引見記名外用八月充四川鄉試副考官歸復命奏對四川吏治民情甚悉

上嘉之十二月記名以御史用三十八年陞雲南司郎中明年授雲南學政君旣至滇釐正文體訓以讀書行己之要不以邊方荒畧爲嫌士人多感激爭自濯磨三年任滿大學士雲貴總督李公侍堯密奏陳薦及回京補陝西司郎中旋授廣東雷瓊道又調肇羅道蠻俗每歲七夕相傳織女下降死者得仙去婦女多自縊者君嚴禁之其弊始革四十五年陞四川按察使時四川有賊名喇嚕子誘少年剽劫十百爲羣嚴捕置之於法賊皆斂跡四十七年以秋審失出部議降調解任回京補禮部主客司郎中未幾又以失察酉陽州焚搶案降員外郎君以勞瘁得病未補官遂告歸旣歸連主餘姚龍山紹興蕺山諸暨暨陽書院卒于嘉慶五年七月二十六日距生于雍正十一年某月某日得年六十八配馮氏子二



長容年十八能讀書次宸尚幼女六人雲鳳雲鶴皆能詩詞  
繪畫餘俱許適士族以某年月日葬于某縣某山之陽容實  
來請銘君生平狷潔不苟取與居處飲食終身如儒生在四  
川時總督少年侈汰所至必索重賄以是責君君弗應銜之  
故其左遷總督與有力焉然歸後以書院束脩自給未嘗有  
所介意也君爲余辛巳所取進士劇嗜余所爲詩李公由雲  
貴總督罷歸復起而督陝甘過西安酒次嘗諷余雲南諸作  
余詫而叩之李公曰此孫學使所刻也君所作昆明湖龍尾  
關易羅池諸詩學使皆刻而列於郵亭之壁余往來數見之  
故能誦也蓋君之篤于師誼如此今君先逝矣君不克誌余  
而余誌君其何忍不銘銘曰  
嗟斯人止于斯人尼之命使之我欲指斥將安施君在九原

當知之

山西寧武縣知縣彭君墓志銘

乾隆十八年余與太倉彭君行之同舉江南鄉試明年會試  
相見於京師旣而散去三十一年君始成進士又以候選歸  
閱二年余參軍事於雲南故君之來而謁選也不復相見顧  
鬚麋言笑思之若在心日比余乞老歸田而君下世已逾年  
矣於是嘆遇君之疎知君之淺不得周旋聚處備知君之學  
術而悉治行之精醇爲可惜也然君選授寧武時同年朱學  
士筠贈以詩云子學甚醇正子貌頗古雅去作親民官神真  
跡乃假而蔣某宰馬邑亦贈詩云入境民盡肥視君彌老瘦  
是君之所以愛民而奉職者可知也已於是仲子兆蓀將大  
葬於新塘之南阡請爲幽窆之志余奚忍辭據狀君名禮字

行之其先出於五代吉州刺史彭玕祖某由歛遷太倉父某育於其舅吳氏因以爲姓至君通籍後復之君生而樸訥顧聰穎嗜學家多藏書靡不瀏覽弱冠補州庠生澹于進取鄉舉後復以會試中明通榜久之登禮闈故其學益以宏衍深邃既授寧武知縣地處馬門徼邊風俗鄙儻君擇士之秀良者使訓于鄉人始知慕學而不以強武觸玕文網年餘縣大治君聽訟務開誠勸諭亦工于摘發縣中豪猾廉得之輒痛懲不貸有婦以奸殺其夫詭爲自縊鄉里已結報君反覆研訊得其情置之于法俗祀貓鬼巫者緣以爲利君聞拘衆巫至搜畫像而盡焚之風遂熄某甲毆其父重傷繼又毆斃從父君謂此元惡也不得稽誅立名而杖殺之始以狀聞上官才其斷不罪也然慎于用刑謂人皆有羞恥心一予杖將不

得爲完人適以使其自棄也時巡撫農公起素以仁廉聞嘗謂僚屬曰古有以經術飾吏事又曰猛以濟寬彭某殆兼之矣將薦會農公病卒不果君素澹于進取自顧年已衰矣遂引疾力辭以去去官日士民泣送有越三百餘里而以壺飧饋者既歸貧不能自存復請以校官用選潁州府教授四年卒于官無以爲殯同官爭賻之始得歸柩于家先是君謁選在京日取諸史傳中循吏故事手自鈔錄或謂古今異宜君曰吾儕能法古人無在不可施其術也今不如古耶在寧武十一年以廉明稱果踐其志也君不獲盡伸其志也君生于康熙某年月日卒于乾隆某年某月日年七十有六著有北窗吟藁金臺倡和詩集等書氏子三人長兆荃次兆蓀幼兆蕙而兆蓀最以才學著東南又能經理君之喪葬

可謂賢也已銘曰

敦題之山沿于梁渠其習也醜其秉也愚吹之嘘之繫而鋤  
之三尾九酌從我趨之雖曰趨之弗竟其撰有書未傳有名  
未煥以貽後昆崇其里閭新塘之糜靈長輪灌瘞此貞珉用  
俟幽贊

同知署廣西平樂府知府余君墓志銘

士君子之用於世必先觀其器識淵然穆然澄之而不清撓  
之而不濁招之而不來麾之而不去然後可以經緯萬端酬  
酢百變而有餘然或勿施於用或施於用不克竟其用者比  
比也可勝嘆哉若是者今於我友余君庚耦見之君名慶長  
號元亨庚耦其字幼敏慧沈靜寡欲年十五爲縣諸生乾隆  
庚午舉於鄉壬申會試未第揀發雲南以知縣用補通海縣

三年調太和又六年卓異陞他郎通判旋以病告歸明年病  
痊赴滇再補維西通判時緬甸用兵巡撫檄至永昌在軍需  
局辦事又三年擢大關同知旋以憂去職服闋時金川方用  
兵四川總督富公勒渾廣東巡撫李恭毅公湖等奏君諳練  
軍需請旨來川補用補成都府同知尋丁母憂總督劉君  
秉恬等復奏請留局辦事奏銷畢乃請回籍治葬葬畢引  
見發廣西以同知用署平樂府知府甫一年因病乞歸歸十  
五年而歿君在任心以古循良爲法時事悉仿經藝而行之  
在平樂立諸生爲齋長又嚴保甲之禁以杜奸宄秉性慈良  
不以苛刻爲能亦不失于寬縱所歷州縣咸有惠政故上官  
皆服其才生平不以趨走爲長亦不與同僚酒食嬉游以取  
結納往往危坐竟日喜愠不形於色每事至從容繙閱皆能

默識而強記之凡上官遣使問故令書吏抽卷牘以進首尾咸備無一顛倒錯誤時緬甸負固不服大兵分道進討經畧出西路由猛養副將軍出東路由猛密中路則造舟數百浮江而下荊州將軍統兵別駐普洱而偏裨營汛亦數十處又京城八旗兵滿州索倫鄂倫春兵及吉林福建水師湖廣工匠絡繹來滇而牛馬糧餉甲仗火藥銅鐵煤炭之屬各以數萬計相望於道晝夜嘽踴不絕隨至而隨應之君分路設站按站設夫凡百所需咄嗟立辦兵役不戢而自寧羽書旁午如棼絲亂麻觀者心搖目眩君獨不震不驚指揮若定洞中窾要其在四川亦如之此皆予所親見愧以爲不可及也始祖名瑊明萬歷兵部尚書居歸德高祖考名成龍妣朱氏曾祖考名國佐妣趙氏祖考名秉乾妣周氏考名如陵乾隆戊

午科舉人妣葉氏三代 誥封奉政大夫妣皆 誥封宜人

高祖由商邱遷于湖北遂爲安陸縣人君配劉氏 誥授宜

人子三肇錫選拔貢生歷官長沙府同知次肇翊乙卯科舉

人次肇端監生女三一適福建連江縣知縣雲夢李萃次適

候選庫大使應山洪萬林次適諸生棗陽孫震甲孫三嗣脩

候選鹽大使次尚伊次若僑孫女一未字曾孫二葆基尚幼

君生于雍正二年十月三十日辰時卒于嘉慶五年正月十

六日辰時年七十有七卽以六年某月日葬于柴家廟之原

君少無宦情在他郎歸養時家有大樹綠蔭數十畝遂築

室其下匾曰大樹山房旁爲因岡書屋賓月亭香雲閣學舫

瘠池累石竹木蒼然又在京師載書數千卷以歸分置其中

俯而讀仰而思賞奇析疑各據其所見以示來學若將終身

焉然則君之出入邊徼羈縻丞倅豈其志之所樂哉所爲詩文皆誦法古人尤喜崑山顧氏炎武故所作多有相似者而于宋元經說尤深著有十經攝提易識五翼義階易義初階易義識疑周書章段春秋比事集訓春秋大義春秋傳辨禮記通論盤庚淺說月令啓蒙大樹山房文稿壬癸詩鈔登仕一紀錄未信存逸緬舌編畧墨池紺珠習園叢談德詒堂家訓凡二十二種總爲五十一卷藏于家君旣歸一年巡撫譚公尚忠聘主五華書院明年子爲雲南布政司延致賓館爲予編次銅政全書刪繁訂異有條不紊其後君弟慶遠在予江西幕府周旋日久故知君性情行事爲最詳昔諸葛忠武云才須學也學須靜也故澹泊以明志寧靜以致遠今君以靜制動以簡御繁是以器識之深如此而借不克竟其用也每念及之輒爲感悼今君子肇翊質樸能文足蹇四千里至錢塘余適主講敷文書院索余誌其墓予何敢辭銘曰不皇皇以競進兮不汲汲以求申其用弗竟兮其德彌淳留迹作兮垂千春柴家原兮五尺墳奠幽宮兮啓仍雲後有餐風而味道者庶其攷于斯文

廣西蒼梧道周君墓誌銘

昔裘文達公以通才絕識延攬天下士予與諸君重光周君稱圭皆與公子麟同年因得往來門下而公之愛君也尤甚凡內廷之著作農部之陳奏皆必屬君書而後入告故公卿間均重其名先是君考教授公與叔編修公同舉於鄉辛未編修公會試第一殿試第三人入詞館明年君從兄震榮登賢書癸酉君與季叔旣濟及兄鼎樞又同舉於鄉而教

授公與君同成進士父子弟兄相繼登科故溯嘉禾文學科名之盛者必以周氏爲首而君之聞望尤著君諱升桓別號山茨穉圭其字世爲浙江嘉善縣人高祖某曾祖某祖某皆耕讀不仕考翼洙以進士官衢州府教授以君貴 賜封中憲大夫妣俱 封恭人君生而敏慧十三能時文十五補縣學生二十一廩於庠乾隆十八年癸酉鄉試中式明年成進士改庶吉士習 國書二十一年丁艱二十四年服闋散館授檢討壬午充順天鄉試同考官取蔣雲師等若干人時稱得士二十八年 大考 欽定一等第二名擢侍講充 武英殿纂修官又 命充 日講起居注官明年補授廣西蒼梧道君素以文學著名既任監司精專吏治捕積猾獲之貨其餘黨白土司之寃皆爲兩廣總督李公侍堯所稱許旋署

按察使因以知府秦某移獄事獲咎効力阿爾泰軍臺軍臺自京師迤北出張家口至烏里雅蘇臺凡二十四站往來文報君督蒙古人馳遞之地苦寒黃沙白草絕少人迹君處之怡然日課通鑑及臨摹占帖凡六年如一日也是時妣俞太夫人年七十有六請於

上得 旨賜歸君旣歸里無以爲家食計四方節鎮夙重君名聘爲書院院長凡歷天津問津揚州安定濟南灤源本郡鴛湖安徽敬敷諸講席所至諸生雲集人人自以爲得師而節鎮知其明練間亦延入幕中咨以政事或代爲章奏者嘉慶五年冬江南總督方以鍾 命 屬而以素患痰疾遂卒於家君少工書爲庶常時 命 文敏公愛重與文達公相等常招至於家故書學文敏以東坡爲法四方人士以緝

素乞書者無虛日長碑短碣得其書寫以爲榮故雖在塞外而以誌銘請乞者猶相望於道也詩清新婉麗有晚遊詩存若干卷未刊君生於雍正十一年八月二十二日卒於嘉慶六年正月十一日壽六十有九夫人姚氏封恭人先卒子四長以照候選主簿出嗣君兄鼎樞其次以煇庠生次以輝候補江南河工通判次以燿附監生君卒後亦歿女四長適海寧舉人陳緝敬次適候補江南河工同知章光祖次適監生吳仲增次未字早殤孫四孫女一尚幼以本年十二月日偕姚恭人合葬於某鄉之某原以照以煇等具行狀來乞銘嗚呼君與予同舉於鄉同登進士見君才情踔厲謂可從容展布克盡所長孰意蹶而不復張也俯仰五十年間文達文敏兩公先後歿謝君之從父諸兄亦皆盡矣同年落落如晨星而君又下世所以讀君行狀而不禁愴然悲也微以照等請予亦何忍不銘銘曰

其榮也孰司之其瘁也孰尸之嗟若人至於斯若堂若斧豕首所依僉謂其後之蕃昌兮我獨懷舊而嗟咨

春融堂集卷五十五

青浦 王昶 德甫

墓志 三

惠定字先生墓志銘

先生惠姓諱棟字定字號松厓先世扶風人九世祖倫遷于吳曾祖有聲與徐孝廉枋友善以九經教授鄉里祖周惕康熙辛未進士由庶吉士改授密雲縣知縣工詩古文著易傳春秋問三禮問詩說諸書考士奇康熙己丑進士歷官翰林院侍講學士兩任廣東學政以通經訓士粵人至今誦之著易說禮說春秋說大學說交食舉隅琴箏理數考紅豆齋小草諸書先生生而凝靜敦樸好學不倦好禮不變以孝友忠信為坊表年二十補元和縣學諸生先是學士從粵歸奏對



不稱 旨罰修鑿江城用罄其家先生退居葑門之泮環巷  
樵蘇後爨意豁如也承其家學於經史諸子稗官野乘及七  
經志緯之學無不肄業及之經取註疏史兼裴張小司馬顏  
籀章懷之註諸子若莊列荀揚呂覽淮南古註亦並及焉而  
小學本爾雅六書本說文餘及急就章經典釋文漢魏碑碣  
自玉篇廣韻而下勿論也甲子鄉試以用漢書爲考官所黜  
由是息意進取乾隆十六年

天子詔舉經明行修之士兩江總督黃公廷桂陝甘總督尹  
公繼善咸以先生名上會大學士九卿索所著書未及進罷  
歸先生嘗以顧氏炎武左傳補註雖取開成石經較其同異  
而義有未盡因發明賈氏昭氏之學附以羣經作補註四卷  
於尙書採摭史記前後漢書及羣經註疏以辨後出古文之

偽定鄭康成之二十四篇非張霸偽造爲真古文梅賾之二  
十五篇爲偽古文作古文尙書攷二卷爬羅剔抉句梳字櫛  
摘其偽之由來皆郝氏敬閻氏若璩所未及雖毛氏奇齡之  
冤詞莫能解也以范蔚宗後漢書因華嶠而成書古人嫌其  
缺畧遺誤而東觀漢記謝承之書不存取初學記藝文類聚  
北堂書鈔太平御覽諸書作後漢書補註十五卷又以漢儒  
通經有家法故五經師訓詁之學皆由口授古文古義非經  
師不能辨也先生四世傳經恐日久失其句讀成九經古義  
二十卷于易理尤精著易漢學七卷周易述二十卷凡鄭君  
之爻辰虞翻之納甲荀謂之升降京房之世應飛伏暨六日  
七分世軌之說悉爲疏通證明由李氏之集解以及其餘而  
漢代易學燦然又撰易微言二卷易例二卷以闡明之又因

學易而悟明堂之法作明堂大道錄八卷禘說二卷發聖人  
饗帝饗親之至意謂古之明堂治朝太廟靈臺辟雍咸在其  
間攷之堯典春秋月令王制無不合也少嗜新城王尚書精  
華錄爲訓纂二十四卷搜採博洽貫串掌故亦爲世所傳先  
生生康熙三十六年丁丑十月初五日終乾隆二十三年戊  
寅五月二十二日年六十有二初聘宋氏繼配張氏又配陳  
氏子四承學承緒承跗承萼以某年月日葬于吳縣西渚邨  
之祖塋先生以名賢後裔蔚爲大儒同里蔣編修恭棐楊編  
修繩武深相器重而常熟御史王公峻尤重之余弱冠游諸  
公閒因得問業于先生及丙子丁丑先生與余又同客盧運  
使見曾所益得盡讀先生所著嘗與華亭沈上舍大成手鈔  
而校正之故知先生之學之根抵莫余爲詳嗚呼自孔賈奉

勅作正義而漢魏六朝老師宿儒專門名家之說並廢又近  
時吳中何氏焯汪氏份以時文倡導學者而經術益衰先生  
生數千載後孰思旁訊探古訓不傳之祕以求聖賢之微言  
大義於是吳江沈君彤長洲余君蕭客朱君楷江君聲等先  
後羽翼之流風所煽海內人士無不重通經通經無不知信  
古而其端自先生發之可謂豪傑之士矣因取陸淳施士丐  
孫復之例稱先生以刻于石且爲銘曰

端門有命標羣經西河退老相師承礪谷瓜實悲秦坑淹中  
棘下蕪榛芳山東大師當炎興口講指畫開文明自唐泉宋  
義漸盲釀嘲閔笑疇其徵先生晚出研道精七經六緯蟠胸  
膺日月爲易窺璣衡或薦于朝困未亨歸而抱犢棲柴荆  
慙遺一老奠兩楹秋山蒼蒼鄰洞庭斑然狸首千秋局吁嗟

儒林亡典型後有惇史眠此銘

江慎修先生墓志銘

余友休寧戴君東原所謂通天地人之儒也常自述其學術實本之江慎修先生乾隆二十七年三月先生卒是年東原舉于鄉明年來京師求所以志先生者卒卒不果又十餘年余自蜀還朝而東原以薦授庶吉士校理四庫館書於是取所自爲狀及汪世重等年譜而屬余銘之先生名永字慎修安徽婺源縣人居縣之江灣曾祖國鼎祖人英皆不仕父期諸生先生生六歲讀書日記數千言嘗見明邱氏大學衍義補徵引周禮愛之求得其書朝夕諷誦自是遂研覃十三經註疏凡古今制度及鍾律聲韻輿地無不探蹟索隱測其本始而于天文地理之術尤深年二十一爲縣學生三十四

補廩膳生四十一歲成禮經綱目八十卷五十五歲借鄉人立義倉貧者賴之六十歲成七政衍金水二星發微冬至權度恒氣注歷辯歲實消長辨歷學補論中西合法擬草七書各一卷六十二歲爲歲貢生成近思錄集註十四卷十月江西學政金公德瑛招爲諸生校閱文字六十九歲成四書典林四十卷又成推步法解五卷七十六歲成鄉黨圖攷十卷七十七歲成律呂闡微十一卷七十八歲成春秋地理攷實四卷七十九歲成古韻標準六卷四聲切韻表四卷音學辨微一卷八十歲成周禮疑義舉要六卷禮記訓義擇言六卷深衣攷誤一卷讀書隨筆若干卷又明年而卒距生于康熙二十年七月十七日年八十有二娶汪氏子二逢聖年卒次逢辰孫三人朝陽朝伸錦波曾孫二人廷珍廷福先生之著

禮經綱目也以朱子晚年攷定儀禮經傳通解其書未成黃氏楊氏續之猶有關漏乃以大宗伯吉凶軍賓嘉五禮爲次廣摭博攷使三代禮儀之盛犁然可睹其著七政諸書也謂歲實爲歷中綱領日平行于黃道是爲恒氣故定氣時刻多寡不同而恒氣恒歲實終古無增損當以恒者爲率梅氏所言歲實消長恒氣注歷見岐未定也其撰律呂闡微也據管子五聲徵羽宮商角之序呂氏春秋稱伶倫作律先爲黃鍾之宮次制十二筩別十二律以正淮南天文訓及漢書歷律志之謬撰古韻標準三書謂古韻之論昶于吳棫而精于顧氏炎武顧氏攷古之功多審音之功淺由三百篇以正顧氏分十部之疎且分平上去三聲皆十三部入聲八部爲用韻之準謂欽定推步法七篇凡日月之躔離交食五星之遲

疾伏見及恒六曜之行皆具密法而奧義難明爲探立法之意詳步算之方并附推步鈔一卷于後又謂深衣之制諸儒論者凡數十家大率踵交解十幅之譌据玉藻言衽當旁則非前後之正幅也舉鄭君之註以正疏誤因爲深衣圖攷晚年讀書有得隨筆撰記謂周易以反對爲序次卦變當于反卦取之否反爲泰泰反爲否故小往大來大往小來是其例也凡曰來曰下曰反自反卦之外卦來居內卦也曰往曰上曰進曰升自反卦之內卦往居外卦也又謂兵農之分春秋時已然不起于秦漢證以管子左傳兵常近國都野處之農固不隸于師旅也其精心獨見發古人所未發如此先生年六十嘗偕友人入都時開三禮館總裁方閣學苞以經術自命舉冠禮昏禮數條爲難先生從容詳對方公折服又吳編

修絨亦深三禮有疑相質無不首肯也乾隆二十八年命  
秦文恭公蕙田修音韻述微公奏先生精韻學 詔取古韻  
標準四聲切韻表進呈以備採擇公又自取推步法解入于  
五禮通攷至戴君總校四庫書乃盡取先生二十種寫之以  
藏祕府先生弟子著籍者甚衆而戴君及金君榜尤得其傳  
自朱子起婺源其後如李燔陳淳之輩咸以道學通經名後  
世越五百餘年而先生復出雖終老跼伏不見知于世而其  
言深博無涯涘昭晰羣疑發揮鉅典探聖賢之祕以參天地  
人之奧厥後戴君諸人繼之其道益大以光先生歿大興朱  
學士筠督學安徽以先生從祀朱子于紫陽書院天下以爲  
公先生以某年月日葬于婺源之某里銘曰  
仰以觀天俯以察地中貫六經聖賢所萃析之綜之會而通

之上推發歛圜則九重或解其頤或折其角遂傾聞人用啟  
來學弗耀弗施山頽木隕筦道之樞厥功不泯肅肅嚴祀配  
于紫陽後有弔者睇此崇岡

戴東原先生墓志銘

門人黟縣知縣張君善長由黟走書來告曰戴先生東原與  
善長相識夫子所稔也今東原卒柩歸于家黟與休寧壤接  
將謀所以葬東原者洪舍人榜旣爲之狀矣敢以志墓之文  
爲請嗚呼余之獲交東原蓋在乾隆甲戌之春維時秦文恭  
公蕙田方纂五禮通攷延致于味經軒偕余同輯時享一類  
凡五閱月而別及余爲中書舍人東原始以鄉試中式來于  
都至余自蜀中歸則東原已被薦擢翰林同寓京師而東原  
遽以病歿蓋余兩人離合之迹如此若東原之敦善行精經

誼余雖不獲企其少分而定交之久與知東原之深莫如余也非余誰當志者按狀東原諱震曾祖景良祖寧仁父弁皆不仕東原以乾隆十六年補縣學生二十七年舉于鄉三十八年奉 召充四庫全書館纂修官四十年 賜同進士出身授翰林院庶吉士又二年卒于官東原生而體貌厚重性端巖十歲乃能言就傅讀書過輒成誦日數千言不肯休授大學章句至大注右經一章以下問其塾師曰此何以知爲孔子之言而曾子述之又何以知爲曾子之意而門人記之師應之曰此先儒朱子所注云爾又問朱子何時人曰南宋又問孔子曾子何時人曰東周又問周去宋幾何時曰幾二千年又問然則朱子何以知其然師無以應大奇之東原讀書默而好深湛之思塾師畧舉傳注講解意每不釋師苦其

煩因授以許慎說文解字東原學之三年盡得其節目又取爾雅方言及漢儒箋注之存于今者搜求研究一字之訓必貫羣經本六書以爲定由是盡通前人古義凡十三經注疏舉其辭無遺者時年纔十六七爾隨父客南豐一年經學益進東原謂經之至者道也所以明道者辭也所以成辭者字也必繇字以通辭繇辭以通道乃可得之又經之難明在一事必綜其全而覈之鉅細必究信乃有徵如誦詩而不知古音強以協韻則已齟齬失讀誦禮而不知古宮室衣服之制已迷其方莫辨其用不知古今沿革則禹貢職方山鎮川澤春秋列國疆域會盟攻戰之地失其處所不知古今推步之法則如夏書之辰不集于房魯太史引以爲正陽之月孟夏東晉古文尙書繫之季秋小雅十月之交鄭康成以爲周正

十月劉原甫以爲夏正十月春秋日食三十六歷代史志載步算家上攷曲合其一而卒違其一儒者何以識古書之眞僞辨箋解之得失決魯歷至朔之當否不知少廣旁要則攷工之器不能因文而推其制不知鳥獸蟲魚草木之名號狀類則比興之意乖六書之學訓詁音聲未始相離聲與音又經緯衡從魏孫炎翻語後攷經論韻悉用之晉人以譯釋氏之言其徒竊爲已有謂來自西域儒者數典不能記憶也中土準望用勾股蓋肇于周髀西法易名三角八綫而正弦比例之根生于勾股則勾股能御三角三角不能御勾股雖深明西法者咸昧其由來也於是日夜孳孳蒐集比勘靡不悉心討索雷同勦說悉掃而除之其學彌博而探指彌約其資愈敏而持力愈堅年二十餘而五經通矣又謂古今學問之

途大致有三或事義理或事制數或事文章漢儒窮其制數宋儒窮其義理馬班韓柳諸君子根柢之以爲文章若分途而馳異次而宿不知其不可以闕一也制數之不明于古人之文多所不省矣經義之不達則所謂義理固一己之義理而非六經聖賢之義理矣君子之道不可誣也蓋東原之爲學自其早歲稽古好學博聞強識而尤長于論述晚窺性與天道之傳于老莊釋氏之說辭而闕之使與六經孔孟之書截然不可以相亂具見于原善原象及與彭進士紹升書蓋其學之本末次第大畧如此婺源江先生永治經數十年精于三禮及步算鐘律聲韻地理東原取平日所學質之江先生爲之駭歎年近三十攷工記圖屈原賦注勾股割圖記諸書已成傳至浙中齊少宗伯召南嘉歎不已元和惠先生棟

三世傳經其學信而好古於荀虞之易鄭孔之禮何休之春秋旁搜廣摭發明古義東原見于揚州交相推重也東原家居同郡鄭牧汪肇龍程瑤田方矩金榜皆從問業至京師光祿寺卿王君鳴盛學士錢君大昕朱君筠紀君的盧君文昭皆折節定交焉其客文恭公所也出江先生推步法解公于通考中盡載其書其後學士朱君任安徽學政盡檄江先生所著書上于朝入四庫全書館東原表揚之力爲多酈道元水經注流傳錯簡東原尋其義例按以準望整之還其舊俾諸水經支川渠委納釐然就貫旋于永樂大典內見酈氏自序且獲增益數事錄之始爲完書嗣又得九章五曹算經凡七種自王寅旭謝野臣梅定九諸子皆未之見東原正譌補脫如劉徽注內舊有圖而今闕者補之書進得旨刊行

之晦者以顯其後得疾足痿不能行猶日夜校讐說  
大戴禮記以次勘定未及上進而疾已亟矣東原所  
鄭詩攷四卷詩補注一卷尙書義攷二卷儀禮攷正  
卷攷工記圖二卷爾雅文字攷十卷方言疏證十三卷聲  
韻攷四卷聲類表十卷原善三卷大學補注一卷中庸補注  
一卷孟子字義疏證三卷原象一卷迎日推策記一卷歷問  
一卷古歷攷二卷勾股割圓記三卷屈原賦注二卷文集六  
心凡遺書二十種曲阜孔君繼涵梓之以行其未成之書水  
記七冊直隸河渠書六十四冊付子中立寫藏于家東原  
生雍正元年十二月某日歿于乾隆四十二年五月某日年  
五十有五娶朱氏封孺人子一中立女一許字曲阜孔廣根  
益繼涵次子也嗚呼東原之學苞羅旁魄於漢魏唐宋諸家



靡不統宗會元而歸于自得名物象數靡不窮源知變而歸于理道 本朝之治經者衆矣要其先之以古訓折之以羣一究極乎天地人之故端以東原爲首昔韓昌黎銘施士丐柳子厚表陸淳皆稱先生蓋以經師爲重今竊取是例以示張君俾刻于幽竈乃銘曰

鄭孔既沒大義寔湮各以闕觀莫溯其全先生兢兢搜元摘秘貫串三才上窮六藝公卿動色

嗟咨媿古大師誰曰非宜龍蛇召災遺言在笥吾言匪俟諸百世

都察院左副都御史陸君墓志銘

惟我 國家重熙累洽蘭臺石室所儲光燭雲漢而

皇上稽古典學復開四庫全書之館以惠藝林先取翰林院

所弄永樂大典錄其未經見者又求遺書于天下書至今仿劉向曾鞏之例作提要載于卷首而特 命陸君錫熊偕紀

君昀任之兩君者攷字畫之譌誤卷帙之脫落與他本之互異篇第之倒置斷其是否不謬于聖人又博綜前代著錄諸家議論之不同以折衷于一是總撰人之生平撮全書之大

概凡十年書成論者謂陸君之功爲最多君諱錫熊字健男一字耳山乾隆二十四年己卯舉于鄉二十六年辛巳成進士二十七年春恭遇 南巡獻賦 行在 召試八一等

賜內閣中書舍人旋充方畧館纂修官時方奉 勅修通鑑綱目輯覽君編撰以進當

上意遂進直軍機處三十三年十二月遷宗人府主事繼擢刑部員外郎進郎中三十八年八月以所撰提要稱 旨改

授翰林院侍讀四十年二月授右春坊右庶子未幾擢侍讀  
學士閏十月充 日講起居注官又充 文淵閣直閣事四

十二年春

奉聖憲皇后賓天凡大祭殿奠上

旨謚典禮嚴重應奉文字大學士于文襄公屬君撰進皆被

旨嘉賞四十三年六月授光祿寺卿四十七年五月授大

理寺卿五十一年十二月提督福建學政五十二年授都察

院左副都御史仍留學政任以五十五年春任畢旋京初四

庫全書之成也君任編輯不任校勘而

上命分寫七分自 大內文淵閣以外 圓明園之文源閣

熱河避暑山莊之文津閣 盛京之文溯閣各庋一部又

于揚州大觀堂鎮江金山杭州西湖皆建閣以庋之而前校

勘者不謹舛錯脫漏所在多有文溯閣書尤甚君以是書曠

盛典不可不其疵類乃請自往校之既而以爲未盡五十

七年正月往 往會山海關道中冰雪凍沍比至奉天病以寒

卒預是書 役者衆矣君獨勤其事而歿可悲也君以文章

學業受 特達之知故自四庫全書通鑑綱目輯覽之外凡

契丹國志勝朝殉節諸臣錄唐桂二王本末河源紀畧歷代

職官表攷奉 勅編輯見付 武英殿刊刻者又二百餘卷

每書成或降 旨褒美或交部議敘或 賜文綺筆硯之屬

奏進表文多出君手

上閱而益善之三十九年奉 特旨召入 重華宮與南書

房諸臣小宴聯句并 賜如意畫軸自餘 特賞 年賞

節賞書畫石刻等物不可勝紀奉使衡文更歲不絕充山西

浙江鄉試副考官者各一充廣東鄉試正考官者一充會試同考官者二提督福建學政者一去取精審所得多知名士士論翕然歸之君冲和純粹其色溫然其言呐然不出諸口而穎悟明敏讀書一過無不洞悉貫串少時以辭賦入中書中年在詞館賓朋酬贈使節登臨四方仰重其名率以絹素來請所作繁富闔溢篋笥顧不甚珍惜輒爲人取去自以上蒙 恩遇逾于常格不屑以詞臣自畫晚年益覃心經濟之學常取杜氏通典馬氏通考合以 本朝會典如食貨農田鹽漕兵刑諸大政溯其因革審其利弊口講手畫侃侃然可以見諸施行而惜其年之不永是以訃至京師賢士大夫如紀君輩莫不爲之曾歔累息者君生于雍正十二年甲寅十一月初二日卒于乾隆五十七年二月二十五日年五十有

九世爲江蘇上海縣人諱鳴球者曾祖考也諱瀛齡以選拔貢生官安徽石埭縣教諭者祖也諱秉笏乾隆辛酉科舉人者考也三代咸以君貴封贈如其官配朱氏例封夫人先君卒以恭順能佐內政爲親黨所推子五慶循慶堯慶庚慶勳慶均女五人孫男三人惟松江陸氏世以文章著見君七世從祖文裕公深在明宏治嘉靖間以通人名德望重臺閣流傳翰墨迄今人寶貴之君官職畧與文裕等若其掌著作而破 思遇有文裕所未逮者且四庫全書定于 御覽尊于 而府分布于海寓騰今邁古千載未有皆君審定而攷正之世之讀提要者見其學術之該博議論之純粹顯顯然如在目前所著寶奎堂文集篋墩詩集雖不盡傳可無憾焉已余與君居同郡先後同官內閣同直軍機處文酒之會靡不同

者輯覽之修余先任其事尋以從獵木蘭而君繼之余常至上海過君竹素堂方池老屋不蔽風雨清修舊德久而彌著然則知君之深無逾于余者慶循等扶柩歸里將卜葬于某原奉狀請銘其何忍辭銘曰

魚圻之裔世以文名繫君繼之蔚其魁閎綜裁簡簡以黻隆平八典書局出主文衡拔諸髦俊用為國楨七畧七錄鉅編既正厥繆謫往來神京風饗雪虐卒瘁于征吳淞遼水共此環瀛雲車風馬其返邱壟文昌華蓋作作庚庚照于幽

詹事少詹事錢君墓志銘

嘉定宗兄鳳喈  
一年夏昶肄業於蘇州此陽書院也  
社院同學因知其妹也  
錢君曉微幼慧善讀書歲

十五補博士弟子有神童之目及院長常熟王次山侍御詢嘉定人材鳳喈則以君對侍御轉告巡撫雅公蔚文檄召至院試以周禮文獻通考兩論君下筆千餘言悉中典要於是院長驚異而院中諸名宿莫不斂手敬之後三年

高宗皇帝南巡君獻賦召試賜舉人以內閣中書補用明年京與同年褚摺升吳荀叔講九章算術時禮部尚書大司馬公翰如久領欽天監事精於推步時來內閣君與論宣讓梅氏及明季利瑪竇湯若望諸家之學洞若觀火何公輒意謝以為不及又以御製數理精蘊兼綜中西法之妙悉心探覈曲嚮旁通繇是用以觀史則自太初三統四分中至大衍下迄授時盡能得其測算之法故於各史朔閏薄蝕凌犯進退強弱之殊指掌立辨悉為抉摘而攷定之君

正書院時吳江沈冠雲元和惠定宇兩君方以經術稱吳中  
志君三世傳經其學必求之十三經注疏暨方言釋名釋文  
詁書而一衷於許氏說文以洗宋元來庸熟鄙陋君推而廣  
之錯綜貫串更多前賢未到之處謂古人屬辭不外雙聲疊  
韻而其秘實具於三百篇中雙聲卽字母所由始初不傳自  
西域皆說經家所未嘗發者尤嗜金石文字舉生平所閱經  
父子集證其異同得失說諸心而研諸慮海內同好如畢纘  
衡翁振三阮伯元黃小松武虛谷咸有記撰而君最熟於歷  
代官制損益地里沿革以暨遼金國語蒙古世繫故其攷據  
精密多有出於數君之外所著經史荅問廿二史攷異通鑑  
注辨正補元史氏族表補元史藝文志三統術衍四史朔閏  
攷金石文跋尾養新錄諸書悉流傳於世君弱冠與東南名  
士吳企晉趙損之曹來殷輩精研風雅兼有唐宋官翰林十  
餘年所進應奉文字及 御試詩賦恒邀 睿賞故詩格在  
白太傅劉賓客之間文法歐陽文忠曾文定歸太僕從容淵  
懿質有其文讀其全集如見爲端人正士也君入中書後十  
九年成進士改庶吉士散館授編修二十三年 大考二等  
一名擢右贊善尋遷侍讀二十八年 大考一等三名擢侍  
講學士充 日講起居注官三十七年改補侍讀學士其年  
冬擢詹事府少詹事君以績學著聞 奉 秦文恭公輯五禮  
通攷及奉 敕修音韻述微皆請相助其時 朝廷修熱河  
志續文獻通考續通志一統志天球圖君 充纂修官己卯  
壬午乙酉甲午充山東湖南浙江河南主 考 庚辰丙戌充  
會試同考官又充會試磨勘官者三充鄉 磨勘官 殿試

執事官者各一京察一等者三卽於主考河南之歲授廣東學政明年夏以丁父憂歸先是君以侍讀學士特命入直上書房授皇十二子書每預內廷錫宴賦詩稱旨前後蒙賜福字貂皮緞疋恩禮有加蓋上深知其學行兼優將次簡畀顧君淡於榮利益以識分知足爲懷嘗慕邴曼容之爲人謂官至四品可休故於奉諱歸里卽引疾不復出嘉慶四年

今上親政垂詢君在家形狀朝臣寅言勸令還朝君皆婉言報謝是以歸田三十年歷主鍾山婁東紫陽三書院而在紫陽至十六年之久門下士積二千餘人其爲臺閣侍從發名成業者不勝計蓋皆欽其學行樂趨函丈卽當事亦均以師道尊禮之而今巡撫汪君稼門待君尤獨摯云君諱大昕

號竹汀曉徵其字生雍正六年正月初七日以嘉慶九年十月二十日卒於書院年七十有七君卒之日尙與諸生相見口講指畫談笑不輟及少疲倚枕而臥不逾時家人趨視則已與造化者遊矣非其天懷淡定涵養有素能如此哉君先世自常熟徙居嘉定曾祖岐祖王炯父桂發皆邑諸生兩世耆年篤學鄉里稱善人以君貴贈祖奉政大夫翰林院侍讀父中憲大夫詹事府少詹事祖妣朱贈宜人妣沈封太恭人配王恭人卽鳳喈妹善記誦有婦德先君三十七年卒君事庭闈以孝聞待鄉黨宗族以嫺睦聞而與弟大昭尤以古學相切劘厥後以孝廉方正徵賜六品頂帶亦稱儒者二餘猶子江寧府教授塘乾州州判培舉人東垣諸生繹侗等率能具其一體文學之盛萃于一門亦可以覘其流澤

矣子二東璧諸生東塾廩貢生候補縣學訓導咸克守家學  
女二一適同縣諸生瞿中溶一適青浦諸生許蔭堂皆則室  
浦氏出孫三師慎師康師光尙幼東璧等自蘇州奉樞歸家  
將以今年十二月初十日合葬王恭人於城西外岡鎮李字  
之原實來請銘嗚呼昶長君四歲回憶與君及鳳喈同居學  
舍時距今忽忽五十七年逮同年通籍同官同朝亦幾二祀  
中間昶以出使滇蜀歷中外與君別日較多而書問往還  
無時不以學問文章相質蓋著作淵原性情趨向有非儕輩  
所得道其詳者然則窀穸之文非昶誰能盡也鳳喈先以光  
祿卿告歸後十二年君繼之又十三年而昶以年屆七十蒙  
恩予告三人者所居百里而近春秋佳日常聚於吳中諸  
弟子執經載酒稱爲三老曾幾何時而鳳喈先逝君歸道山

又期年矣獨昶龍鍾衰病淹息牀第且念企晉損之諸友更  
無一人在者執筆而書君行事可勝悲夫銘曰

博文約禮道所基下包河洛上璿璣三才萬象森端倪君也  
閱覽兼旁稽海涵地負參精微儒林藝苑資歸依龍蛇妖夢  
未告期文昌華蓋沈光輝九九松柏臨湖澹三尺堂芥千秋  
思

想  
未嘗賦文昌華蓋殿賦式武林詔賜館三只堂於千六  
閱費兼受辭賦賦此員參詳翰林藻英資詞必詞賦  
曹文以甄識其基不台西谷上擬疑三木高象終滿即昏也  
無一人亦皆輝筆而舊吾台萬西初想夫論曰  
又賦平矣辭味讀驗其亦動息其哉且念金晉賦之清文與

春融堂集卷五十六

青浦 王昶 德甫

墓志四

都察院左副都御史申君墓志銘

乾隆元年徵博學鴻詞之士用備館閣而大學士嵇文敏公  
會筠以申君甫薦於 朝是時薦在京輦者凡百數十人而  
君之詩名最著其後君雖不第尋以中書舍人歷官至副都  
御史又好推獎士類一語半律之士輒吟賞嘉歎士大夫之  
言詩者走集其門故稱詩於都下咸以君為宗君名甫字及  
甫其先系出池陽後遷於揚州曾祖懿典祖元會父承德三  
世皆 贈資政大夫如君官君少敏悟下筆輒見新意乾隆  
六年辛酉順天鄉試中式明年試授中書舍人九年在軍機



春風堂集卷五十六  
處行走十四年擢內閣侍讀十五年遷刑部郎中十八年授  
順天府府丞府丞兼學政事京師金臺書院立子膏火不足  
用謀於總督方公觀承撥保定蓮花書院餘貨以佐之自是  
來學者益衆二十八年授光祿寺卿二十九年授大理寺卿  
三十一年授都察院左副都御史三十二年以事降調三十  
三年補太僕寺少卿尋遷通政使三十九年仍授左副都御  
史如故四十三年病脾泄久而不愈以六月十五日卒於寓  
邸年七十三有笏山詩集十卷君兄弟三人兄來君所家雖  
貧衣服飲饌必加於已一等及兄與弟歿招其從子來於京  
飲食教誨之直軍機處凡三十餘年中更戡金川討準夷平  
定回部軍書旁午日不暇給君戴星而入比暮而歸爲  
聖主所深知宰臣所倚任與胡巡撫寶琮蔣侍郎炳同至於

奉命起草每奏進必當

上意政事填委手批口授皆能明晰曉暢洞中機要則二君  
或不逮焉然君最以詩鳴常以重陽日同查禮諸君集陶然  
亭君詩先成四座閣筆稱歎先時寓時晴齋爲江文端公故  
第春暮藤花開必招集同志畱連小飲又賞芍藥於豐臺尋  
菊於憫忠寺歲以爲常故詩亦最夥君詩源於白香山出入  
於劍南石湖放而之楊誠齋在本朝於查悔餘爲近每扈  
從幸熱河恭和御製詩既進傳旨嘉賞故世益以其  
詩爲工嗚呼

今上元二之間昭宣鴻朗天下文人稱爲極盛其薦而遇者  
若大學士劉文定公綸雲南總督劉公藻太僕寺卿陳君兆  
崙其薦雖未遇而致身貴顯者若尙書裘文達公曰修沈文

愨公德潛左都御史金公德瑛若仕未甚達與偃蹇以終者  
爲桑調元符曾厲鶚胡天游劉大槐方貞觀等然衡其著撰  
豈以遇不遇爲增損歟君仰受文人稱爲盛德其德而思其  
聖天子特達之知晉登九列不惟知其人且知其詩文學政  
事兼而有之然則君詩固必傳於世而元二之間人文蔚起  
不可於君徵之哉君配李氏年六十餘妾連得四子高佑嘉  
佑同佑永佑今已嶄然露頭角能讀書是年某月歸其柩於  
揚州明年某月葬於某原高佑等使來請銘乃銘曰  
少作名士晚稱鉅公以昌其詩爲世所宗豈惟傳世聞於  
九重西清東觀我躡君蹤每見退食吟嘯雍容匪無德行協  
於友恭匪無政事達於兵戎長吟獨謠乃性所鍾視今罕儷  
與古爲從嗜君詩者其矚斯封

雲南沅江府知府商君墓志銘

會稽商君寶意以詩鳴海內者垂四十年乾隆二十九年冬  
君服闋朝京師

上特擢爲雲南府知府於是輦下知名之士喜君之見用而  
惜其有萬里之行相與招邀置酒賦詩以贈之明年調沅江  
又明年四月二十七日以疾卒於官三十三年余從軍過昆  
明則子某將以喪歸葬於會稽而請余爲幽窆之文悲夫按  
狀君名盤寶意其字明文毅公輅九世孫曾祖某祖某父某  
皆 贈中憲大夫妣皆 贈恭人君自幼聰穎五歲能辨四  
聲七歲塾師舉鳥獸草木之名悉能成對十七歲補博士弟  
子雍正八年年二十成進士改庶吉士授編修乾隆三年翰  
林輪班引 見君乞外授江蘇鎮江府同知五年調安徽太

平府同知十二年丁憂釋服授湖北施南府同知十九年擢廣西慶遠府知府二十一年調鎮安二十七年遭繼母喪去位再起卒於雲南距生於康熙五十年某月某日年五十有六配某氏子二某某君英雋募儻以詩自豪美鬚髯工談笑所至必傾其名士彈絲擲竹妙得神解解官居秦淮水榭眷一姝麗姝臨去出白玉墜爲贈君把翫不忍釋手江寧令袁君枚過之投諸河君以防止水使人涸而出焉雖蹈或溺不顧也王西曹又曾寓金陵常乘秋月夜送客櫂舟汎秦淮聞水榭中簫聲叩之一人于思攜燈出見乃君也握手大笑重置酒達旦而別世爲邀笛圖以寫之君賦才瑰麗詩歌上仿四傑下仿元白炳若列繡淒若繁絃揆以古人繩尺不爽繫黍故所著質園詩集尤爲海內所稱嗚呼以君之才之詩旣不獲雍容侍從以盡奏其長而僻居蠻徼又不獲施諸政事浮湛中外姑自比於温岐杜牧豈果性情之所寄抑或意有不自得而遂託於是耶然海內知名之士言詩者必歸君言風流儒雅者必以君爲首則君可無憾於九原矣乃作銘曰其宦也蠻陲其瘞也鑑湖之麋織雲錦兮成文詞一官偃蹇兮奚其悲

翰林院庶吉士吉君墓志銘

東西晉士大夫稱風流標令者必以衛叔寶劉眞長爲首叔寶蕭眞簡淡與其兄以在三之節相勸勉及爲王處仲所辟固辭不就眞長性不偶俗於桓宣武貴盛時獨詆訶不少假其簡傲伉直如此蓋士大夫束修自好必於世若不甚接乃能皎然皜然蔑視夫勢利權貴之爲而卒以身爲砥柱此豈

卑疵熾趨之徒所能希蹤萬一也哉是以吾於吉君之歿而傷悼不能已也君名夢蘭字會亭行三世爲江南丹陽縣人祖某父某皆不仕兄長夢賚甲子副榜貢生黟縣教諭次兄夢熊今以編修改官御史君癸酉舉人丁丑成進士授翰林院庶吉士自幼姿神散朗見者咸以爲晉代人旣入詞館諸公要人爭慕招致之君漠然無所詣其他俗客來謁者亦輒令闔以病辭於同年生中獨與余善所居米市衙衙地窪下五六月中中庭積潦深尺許施版其上如畧杓然久之少人行版上長苔蘚余恒以暇日造君君方病六臣文選註詳畧寡當參稽摭拾欲別爲書與余繙閱故籍互相質難日移晷不以爲倦君素羸已卯自秋涉冬病增劇乃以庚辰三月請假歸四月十七日舟抵濟寧病亟薄暮灑然起曰有尊客迎

我宜盥漱盥畢趣令焚香煙起而逝嗚呼其去來之迹豈偶然歟君生於雍正己酉歿於乾隆庚辰年三十二歲娶於林生二子長曰士瑛次曰士琦以某年月日葬於丹陽之某鄉其兄御史君實來請銘嗟乎自余爲諸生始識教諭君於江寧在蘇州又辱與御史君同席視其後遂與君同舉於鄉以君之不我棄也故知君爲深使天假以年其束修自好之實必見諸事而惜其遽摧折也余故舉衛叔寶劉眞長以例君君雖未得稍有所施後之愛慕君者亦可以知君也已銘曰士窮失已成有渝酒食遊戲工嬉娛蛾子附羶爭膏腴君獨清峭爲異趣如林蘭蕙江芙蓉神仙之儒山澤癯滅而有實云何吁大江東流環幽墟委形於此寧其居

翰林院庶吉士汪心揆墓志銘

汪子心揆歿之四年長子慕奉其祖訓遣一伴走三千餘里以狀告曰爲善少愚蠢禱昧惟夫子教迪引翼之取科第進廁於詞苑顧無祿旋以嬰疾歿茲擇壤命龜迄墨食幸夫子哀憐錫之志以光寵汪氏俾爲善不泯地下且有以慰諸孫余何忍辭按狀爲善心揆名本籍安徽休寧遷蘇州爲長洲縣人曾祖某兵部主事祖某同知父鏊監生心揆自祖父皆工治生以資轉鬻四方及心揆年十八爲縣學生性寬厚謹畏於聲色遊戲無所嗜損衣節食與貧窶士偶從余學二年稍通經術原本閒爲詩和平莊雅稱其人乾隆庚辰入京師中順天鄉試明年會試復中式殿試二甲第八遂授翰林院庶吉士心揆容止豐偉不數月以諸生入詞館名大起座主相國錢塘梁公諸城劉公尙書于公敏中侍郎觀公保暨

尙書秦公蕙田侍郎錢公維城交口推以爲國器是年六月以中暑病肝脈稍弱秦公過其舍診之曰左脈循尺以上空空然孔<sub>有</sub>腎法宜補投以人蔘地黃可已然閱五日竟卒家人持其喪歸於蘇州心揆卒之日其家忽晝晦雷虺虺走庭中所觸物皆碎若有神告之者心揆生於雍正十二年某月某日以乾隆二十六年七月初六日卒年二十有八弟二人應奎吳縣學生亦學於余季爲仁監生娶陶氏生子四長卽慕也次某某以某年月日葬於某原銘曰  
謂榮也不知曷以升謂悴也不知曷以逝豐其遇矣迺嗇諸年謂天夢夢疇測其然山盤水鬱歸骨於阡吾則安能召巫陽命靈氛叩詹尹而箬以莛蓍

內閣中書舍人張君墓志銘

張君策時名熙純一字少華江南上海縣人性寡儻疎豁意所不相得悻悻然見於顏面不知人世有嶮巇陷阱好飲酒閒亦博簞詔號以爲樂然嗜詩特甚堅苦刻琢迤邐蘊蓄久之乃大放翁張頓挫喑鳴叱咤力若可辟萬人是以人皆頌其詩之工余以丁卯爲文會同郡與於會者十四人君獨與趙君文哲及余最親是時君已有聲庠序然家益貧試於鄉亦屢黜後爲侍郎夢公麟所知李公因培任浙江學政因召入幕而幕有忌君者君不自安去入京師應壬午順天鄉試得中式明年會試又見黜於有司歸逾年乙酉

上南巡君獻賦

行在

召試授內閣中書舍人明年丙戌

充方畧館纂修官君自念以寡儻疎豁故致齟齬迺折節自下遇人頽乎其順抑抑乎惟謹言若不能出諸口曩時嬉笑怒罵之態刮削無有存者人謂君齒漸長故性情漸平不知其剗削崖岸以與時人委蛇以避世俗彈射蓋用心苦而意氣亦殆盡矣丁亥八月余隨

上獮於木蘭始聞君疾比歸則疾已劇越三日卒時惟九月之二十五日也距君生於乙巳六月十六日年四十有三君祖永昇父懋皆不仕無子以兄子培材爲後一女適同縣黃兆鰲卒之年十月其妻彭氏持喪歸以某年月日葬於南滙縣之二十保三區其兄書來乞銘嗚呼自君與余同會迄於今垂二十五年交益親君母夫人卒余作文弔之言君雖無以爲養其文與行必有以顯揚於世君讀之而泣及在京師館余家酒酣以往具言生平閱歷輒欷歔流涕因出所撰華海堂集屬余序余言君乃古之所謂狂者其欹寄歷落之

概與掩抑阨塞之狀一發諸詩觀其詩如見其人君讀之忻然而笑世亦頗以余爲知言然則銘非余誰宜銘曰嗟乎張君天所慳也稚而孤露茹辛酸也長而依人飽艱難也空堂幽幽罕秭莞也刻劃圭角弗屑刊也誰爲含沙忍瘡癩也晚始一遇顛已斑也禬斐視含涕潺湲也如雲之氣束此棺也舍十得一名不刊也用昌其詩澥迴瀾也我斲銘辭不敢謾也

翰林院編修嚴君墓志銘

乾隆五十七年九月二十四日翰林院編修嚴君卒於京師越二十餘日長子榮自商邱次子晉自吳縣先後奔喪至於是拜賓受弔始克成禮蓋君素清羸多病先於五十六年得怔忡疾治弗效求假就醫吳下比五十七年五月疾愈赴

闕供職眷屬皆未及從故兩子深以爲痛焉今春二月榮晉將歸葬於吳縣碧螺峯先塋屬余志其墓君先與余居同里又前後直內閣又申之以婚姻知君行事最悉微余誰宜銘者君諱福字景仁一字愛亭世居吳縣之洞庭東山曾祖信豫不仕祖有武考授州同知父明選歲貢生皆以君貴贈如其官曾祖妣溫氏贈太安人祖妣苻氏妣徐氏皆贈太宜人君少敏悟二十四年補吳縣學生二十七年壬午中順天鄉試三十四年己丑會試中中正榜時會試副榜多以中書學正用故有是稱四十年乙未會試中式第一 殿試二甲第五改庶吉士四十三年散館授翰林院編修旋充四庫全書館校對官又充 武英殿 國史館方畧館纂修官四十四年己亥 恩科鄉試充河南正考官取中楊維榕等七十八

號爲得士四十六年派教習庶吉士四十八年充 上書房  
師傳是年五月丁徐太宜人憂五十年服闋仍 命上書房  
行走并 賜貂衣一襲明年正月 命入 重華宮茶宴聯  
句 賜名人書畫及 上用筆硯後率以爲常君感激 恩  
遇雖祁寒必以五更入直怔忡咳嗽勿顧也假還督課益勤  
今秋因寒得痢數日氣逆上令僕扶掖坐而瞑距生乾隆三  
年九月十二日年五十有五配葛氏先君卒子榮乾隆癸卯  
舉人初娶余女繼娶商邱陳氏晉太學生娶休寧黃氏咸有  
文名女四人皆適士族初君之先世以殷富稱至君因宦毀  
其產晚歲損衣節食不翅寒素人或以是悼君然君以名甲  
科入詞苑纂修校勘身兼數職出奉皇華入侍 講幄固已  
備儒生之榮遇矣生平蕭閒眞淡溫然粹然觀化時至飾巾

待盡蓋東郭順子溫伯雪子之類人貌而天緣虛而葆眞卽  
余所謂知君行事者皆其迹也而人又何悼焉乃爲銘曰  
具區泚澗靈秀所鍾上直斗牛有光熊熊君也受之起爲詞  
宗惟位不顯厥望則崇惟年不劬厥德則充山盤樹鬱馬鬣  
是封以昌後裔其妥幽宮

翰林院編修蔣君墓志銘

乾隆十九年余會試在京師以通家子得謁總憲金檜門先  
生時鉛山蔣君士銓先生門下士也以能詩鳴故詩酒之會  
無不共之迄今忽忽三十餘年其間離合無定而郢石之知  
罕有逾於君者自先生下世二十餘年君又繼之所謂臣之  
質死久矣於是其子知廉等以狀來乞爲幽窆之銘余其忍  
辭按狀君字心餘一字茗生號清容祖承榮父堅皆不仕君



生四歲母鍾宜人授以四子書及唐人詩一過不忘清江楊勤恪公異之待以國士從父至山西讀鳳臺王氏藏書學益富年二十二檜門先生督江西學政拔補縣學生以孤鳳凰稱之十二年中丁卯科鄉試十九年考授內閣中書舍人二十二年成進士改庶吉士時余亦 召試爲中書舍人故與君之交益密二十五年授編修充 武英殿纂修官二十七年又偕余充順天鄉試同考官二十八年充續文獻通考館纂修官明年奉母南歸居金陵久之浙江巡撫請主紹興蕺山書院凡五載兩淮鹽運使復請主揚州安定講席奉母以行四十年鍾宜人歿服終入京充 國史館纂修官尋患風痺時淹臥牀第間四十四年余請假還 朝往候之君笑曰已作習鑿齒矣談笑間目光猶炯炯也四十六年復病歸南

昌至五十年二月二十二日卒年六十有一君生歿之日皆無雨而雷風故世以爲異云子七長知廉拔貢生充四庫館謄錄官次知節舉人次知讓 召試賜舉人次知白知重知簡知約皆幼生平著藏園詩文集若干卷存於家君風神散朗如魏晉間人從容讌笑繼以諧謔而甄錄寒峻激揚忠義有古烈士之風博通淹雅自古文辭及填詞度曲無所不工而最擅場者莫如詩當其搖毫擲簡意緒觸發如雷奮地如風抉土如熊咆虎嗥鯨呿鰲擲山負海涵莫可窮詰故論詩於當代以君爲首而論君之詩以五七言古詩爲極則君與禮部尙書彭君元瑞生同鄉成進士同年又同官翰林上賜詩嘗有江右兩名士之目今彭君置身華要而君官不過七品往蹇來反卒纏綿於惡疾歐陽子曰士患不逢時時

春風堂集卷五十一  
逢矣患人主之不知知矣而不用者命也如君洵可謂之命矣五十二年某月日知廉等葬君於某縣之某鄉乃作銘曰維遇之嗇繁才之豐匪惟才豐志行攸崇扶幽發潛扶孝植忠何登朝著痲疾乃叢有山崇崇有水淙淙曰歸斯邱馬鬣以封凌雲之氣闕於幽宮發爲詩歌翻蜺走虹如有不信驗此雷風

翰林院侍讀學士褚君墓志銘

翰林學士褚君廷璋以才望重於時入詞垣侍講幄兼綜書局而頻以衡文校士受

聖主特達之知四方士大夫仰其學術而不知實本尊甫式似先生之教也昶與君以召試同年先於弱冠時同學因以獲見先生先生進而教之其意舒舒然其色融融然蓋望而知爲有道長者時常熟侍御王公峻以風節自持少許可獨於先生之歿作傳以志梗概蓋迄今四十餘年矣於是君卜葬先生遂以侍御之傳使來請銘按先生諱毅字式似世爲吳中望族曾祖諱笈崇禎丙子副榜貢生祖諱人獲考諱恕皆諸生先生世傳春秋學貫串三傳以救胡氏之失精研經籍手自鈔錄爲文鉤心鬪角務造單微後浸淫於史漢及唐宋諸大家以理氣法三者爲宗教授里門從者日衆書宗歐虞上溯二王爲人恂謹無嗜好清修遠俗而篤於周卹舊篋有親朋貸券數十紙悉焚之與楊太史繩武同里衡宇相望時時過從譚藝侍御主紫陽講席因與定交質以古今成敗事物源流數千言不能盡俱心折爲老師宿儒也尹文端公繼善撫吳介人以書幣來聘辭不赴綜其生平孤高絕

俗迴與世殊蓋侍御之傳如此先生生於康熙三十八年某月日歿於乾隆十四年八月年五十有一 誥贈資政大夫

日講官起居注 文淵閣直閣事翰林院侍讀學士配王

氏仁孝勤儉歸先生後盡斥其金珠羅綺以供堂上甘旨躬操井臼鄉里稱其賢累 封太夫人後先生三十二年而歿

子一卽廷璋女一適監生高官孫二兆磨兆鷺以嘉慶元年

十一月十三日合葬於元和縣東廿二都十三畝淵字圩祖

塋西偏銘曰

通經高第肇少孫護軍僕射忠而純清門貽澤千載存流傳

吳會彌芳芬先生以養全其真厥德愈劭色愈溫闇然日章

聖所陳聿有文藝啟後昆文昌華蓋衆所尊曰卜吉壤修窆

窀嗟茲堂斧風氣屯雲初奕世垂蘭蓀我衰撰述詎足論侍

御有作懸彤旻

翰林院檢討前兵部右侍郎吳君墓志銘

吳君香亭之卒也其姻家觀察宋君思仁函其諸子之書及內閣學士錢君槩所撰年譜乞爲墓志之文嗚呼君以乾隆十八年中河南鄉試副榜是秋余亦舉於鄉蓋世所稱同年也十九年余在京師君尊人中丞公方爲山東鹽運使以書抵總憲金公德瑛及禮部侍郎秦公蕙田延余至其署與君同學蓋迄於今幾五十年矣君初名琦字廷韓繼改名玉綸號香亭其先元世祖巍由江西遷河南光州固始遂爲其縣人皆以儒業世其家高祖自榮曾祖宏緒皆邑學生以厚德稱於鄉里祖用烈歲貢生官淇縣訓導深通理學時稱南長先生父卽中丞公諱士功雍正十一年進士改庶吉士散館

授主事由吏部郎中歷御史出爲直隸山東監司歷任按察  
布政兩司至湖北福建巡撫君少而警敏就塾讀書能見其  
大塾師已矜異之年十八入光州州學乾隆十八年登副榜  
二十一年舉於鄉二十六年成進士改庶吉士二十八年散  
館授檢討充 武英殿纂修三十年充順天鄉試同考官三  
十三年遷貴州道監察御史三十五年二月遷刑科給事中  
五月陞鴻臚寺少卿三十六年陞通政司參議三十七年陞  
內閣侍讀學士三十八年五月陞光祿寺卿十月遷太常寺  
卿三十九年充順天鄉試同考官四十一年

上以金川平將告成功於 闕里 特命君先往演習禮樂  
四十四年又以熱河 文廟成

上將親往釋奠亦先遣往習儀四十五年正月扈 蹕南巡

四月陞都察院左副都御史四十六年充會試副總裁得錢  
榮等一百六十八人榮四十四年江南解元尋以第一人及  
第當世榮之四十八年六月充浙江正考官是年九月授福  
建學政五十二年還京二月授兵部右侍郎兼署吏部左侍  
郎四月 命考咸安宮景山覺羅八旗各學教習未幾以督  
學福建特蜚語上聞

上命浙閩總督李侍堯查核覆奏左遷內閣學士五十四年  
三月京察又降爲三品京堂四月以失察本籍家人私開溝  
渠一案改降四品十月降檢討在 武英殿行走蓋君以世  
臣由詞林御史洊陟卿貳每有條奏奉 旨嘉獎勅部議覆  
施行久爲

聖明簡在故雖經責降猶得出入承明以編摹自効由其受

知有素也君既復歸館職悉心纂校凡七年而年已六十有四年衰多病大臣久奏 詔以原官休致既歸俯仰邱園教子孫以孝弟讀書一如中丞公之所以教君者君氣質厚重涵養純粹方謂耄耋可期而不虞以腹疾遽終也君生於雍正十年某月日卒於嘉慶七年九月日享年七十有一君能詩然不多作今存六卷吏部侍郎童君鳳三稱其瑰麗豐縟歸於醇雅尤喜爲古文禮部尙書紀君昫稱其於古人不必求合而紆徐曲折言短而味長今存十二卷至於時文服膺先正取法在薛應旂胡友信問總憲竇公光鼐少所推許獨重其文時時奏及故

上亦褒嘉之今刻橐並藏於家君三代先以中丞貴累贈中憲大夫又以君貴晉贈資政大夫例贈光祿大夫高祖妣楊氏曾祖妣楊氏祖妣王氏繼祖妣陳氏妣任氏皆贈淑人晉贈夫人娶任氏先封孺人累封至恭人例封夫人先卒子鼎颺鼎枚鼎輔鼎銘葆晉鼎枚先卒鼎颺四十五年舉人內閣中書次鼎輔候補運判鼎銘候補主事餘尙幼孫五人長以醇六十年副榜茲以某年某月偕任夫人合葬於城西四十里之胡族舖嗚呼君之成進士也余適爲同考官而君卷出於編修謝君墉之房既撤闈握手欣慰異於尋常及 南巡時君爲太僕寺卿余爲都察院左副都御史隨 蹕至嘉興余奉 命讞事山東旋授江西按察使而君卽補其缺是時相國嵇文恭公亦在 行在執手謂兩人曰衣鉢相傳真佳話也蓋爲同朝欽慕如此方今同年之在朝者惟工部尙書彭君元瑞暨廣東布政使康君基田其餘如落落晨星僅有

存者而君以同年同學先余而亡微宋君之請余亦何忍不志而銘諸銘曰

其德也溫而恭其行也謙而冲其發爲文也雅潔而雍容若堂若斧歸於其宮水深而土厚兮利後嗣兮靡窮

刑部員外郎汪君墓志銘

汪君韡懷娶於少司馬榆山凌公之女公家上海君往候起居因與公從子祖錫及張君熙純趙君文哲同游於九峯三泖間賦詩相樂比至吳門時吳君泰來爲公外孫家有池亭圖史之勝君屢往過之又與嘉定王君鳴盛錢君大昕曹君仁虎桐鄉朱君方霽并吳縣張崗沙維杓兩布衣倡和而余追逐其間尤爲親厚君本世家無聲色紈袴之習嗜詞章喜賓客居揚州爲四方舟車之會名流翕集造門延訪君亦折

其最著者則有程編修夢星晉芳張編修馨給事坦  
馬員外曰瑄曰璐易主事諧其寓居於揚州則有陳徵君撰  
君若鷗惠徵君棟杭編修世駿金布衣農陳布衣章明經臯張  
同知四科沈上舍大成題襟奉袂皆與君結文字之交如抱  
山堂小玲瓏山館歲時宴集必招君而君賦詩嘗爲壓卷及  
游京師先爲常熟蔣文恪公錢唐符郎中曾秀水鄭編修虎  
文所賞又與秀水錢贊善載同鄉秦黉沈業富兩編修游潭  
柘寺萬柳堂聯吟紀事益爲都下所稱君少爲諸生工時藝  
南北試皆不利乃入資得國子監博士久之補刑部員外郎  
在部時與郎中阮葵生馮廷丞陸錫熊復常爲文酒之會人  
以明白雲亭之比也然君勤吏治伯父漢昭任山東糧道署  
按察司事君因以習法律及任西曹總理部務劉文正公深

歎能平反出入頗多抉摘而於河南書籍違悖之案力辨其  
冤奏上得釋蓋其明恕如此在部兩載餘以父病乞歸侍疾  
晝夜不少懈及喪哀毀伯叔兄弟人衆有不足者助之有爭  
者讓之是以家中落然亦不介意也君生於康熙庚子年  
十二月卒於嘉慶辛酉八月年八十二其先出唐越國公後  
六世祖諱道貫其兄道昆官兵部侍郎以詩鳴與王元美李  
滄溟時稱七子故道貫亦與敬美齊名高祖諱立諸生累  
贈中議大夫妣吳氏累 贈淑人曾祖諱壽岳貢生累 贈  
資政大夫妣吳氏累 贈二品夫人祖諱天與官刑部郎中  
累 贈資政大夫妣黃氏潘氏累 贈二品夫人父諱治佐  
貢生 誥封中憲大夫妣程氏 贈恭人配凌氏 封恭人  
即榆山公之女有淑行子二光烜諸生出嗣弟 後光燦

廩生女二長適貢生洪錫曉次適諸生陳贊詠孫一履基尙  
幼君詩淵微窈眇有玉江寧韋蘇州之遺詞以王碧山張玉  
為法清虛雅淡見重於詞家所著對琴初藁春華閣詞已  
刻其餘藏於家君歸田二十餘年余始得蒙 恩致仕每以  
公事過揚州必訪君留連浹夕見君賦詩飲酒如平時沈運  
使業富阮中丞元俱稱其所作老而愈工而江浙士大夫皆  
推為名宿方喜精神強固不意無疾而終自君之歿東南耆  
舊昔與君共游處者寥落無幾讀君事畧不禁潛然出涕也  
光烜等以事畧來請銘余何忍辭君名棣自號對琴韡懷字  
也銘曰

為詩人為天民秋官小試奚足云有子麟角傳其文空於斯  
邱永不泯

浙江按察使陸君墓志銘

吳中以顧陸朱張爲四大姓而陸氏人才尤盛蓋自漢三國六朝迄唐宋見於史傳者多至數百人至明文定公樹聲尤以衰年宿望重於鄉國迄今士大夫景仰不衰而陸君重暉其第七世孫也君名伯焜號璞堂重暉其字文定公本籍華亭子彥章官至刑部侍郎孫景行國學生曾孫慶臻始遷青浦明崇禎壬午舉人揀選推官不就子光弼諸生是爲君之曾祖祖瑜康熙庚子舉人丁未明通進士泰興教諭父楣二代皆 贈中憲大夫翰林院侍讀學士祖妣顧氏妣蕭氏皆封恭人君少而英異十歲五經三傳已俱遍誦十七歲爲 明年補廩生時余方與吳下諸名士爲文酒之會君亦來從吳企晉趙升之曹來殷張策時諸君游而陸君健男木

同宗尤以詩文相得余官內閣君因至京師未幾館工部侍郎倪君承寬家余同年也金壇于文襄公聞君名延主書記公性機警敏捷時方爲戶部尙書直機地兼 南書房 懋勤殿翰墨紛拏悉以屬君君精心果力分別應之動中款要無稍遲誤公相倚如左右手凡扈 蹕之地必以相隨三十八年

高宗純皇帝巡幸天津君獻賦 召試 賜舉人尋援例得內閣中書舍人四十二年冬丁憂服闋補官四十五年成進士 殿試二甲第二改庶吉士充 武英殿分校官日下舊聞纂修官明年散館一名授編修兼撰進 呈文字四十八年充順天鄉試同考官又明年教習庶吉士補三通館纂修官四庫館提調官五十年 大考翰詹一等第一陞侍



讀學士旋充 日講起居注官五十一年京察一等五十三  
年充順天武鄉試正考官五十五年充會試同考官得齊嘉  
紹桂馥祝曾等六人五十六年再經 大考改吏部員外郎  
掌考功司印五十八年陞考功司郎中掌文選司印充吏部  
則例提調官六十年充順天鄉試同考官是冬保舉京堂陞  
鴻臚寺少卿嘉慶元年陞光祿寺少卿二年授江西按察使  
九月調浙江按察使君在翰林十載以文章受

主知累擢高等而刑名非所素習任江西以訟牒紛繁倍於  
他省在浙江時方緝捕洋盜每獲四五十人生死出入問不  
容髮君晝夜研鞠詳求律例苦心比擬反覆至於數四本有  
肝疾由此日劇四年正月遂以病假乞巡撫轉奏蒙 恩允  
許是冬南河總河吳君璣入都 陛見

上詢陸伯焜疾何時可愈蓋 眷念殊未已也君歸建家祠  
兼置義田贍宗族其文定公以下各代祠在郡城者皆爲修  
葺越二年病少愈將治裝北行而肝氣復發臥牀月餘而歿  
君生於乾隆七年九月初三日卒於嘉慶七年十一月初六  
日年六十有一配王氏例 封淑人卽余從兄本蕃之女子  
二長元琦國學生次元珪未娶孫六人壽銘壽鈞壽銓壽鎔  
壽錫壽鏗俱幼以八年十二月初三日葬於本縣字字圩七  
閒村君詩少習三唐後出入於王阮亭查初白兩公間清新  
婉約故爲企晉諸君所稱其後專爲應奉文字又單心吏牘  
不復多作僅存玉笥山房詩四卷皆雅音也昔文定公中年  
登第仕至大宗伯而立朝不滿一紀嘗作適園以爲生平休  
息游衍之所君年未六十以病乞休曾繪適園長卷思承祖

德而園廢已久無從構造遽以病終然則令名壽考天之豐於昔而靳於今也豈非命哉余與君托絲蘿之契事余禮先一飯三十餘年出處仕宦之間周旋無間而歸田之後不獲同山水魚鳥之樂繼文定公之百一是可爲層欷而紉息者已銘曰

鸞坡鳳掖耀詞章也漸江彭蠡播慈祥也因於二豎旋江鄉也思述祖德圖縹緲也志而未遂歸於其藏也若堂若斧伊余哀之傷也松楸葱鬱卜流澤之孔長也

前 經筵講官都察院左都御史吳君墓誌銘

同年總憲吳君冲之之將卒也語其子曰吾與王君德甫生同鄉 召試同爲中書出入同朝者四十餘年悉吾生平行事歿後必乞爲志墓之文既卒其子奉遺命書來乞銘嗚呼

君小余五歲余弱冠後取友於同郡之士先交君及趙君升之張君策時既而又交君弟泉之及陸君健男相與磨切學問以文章爲已任其後六人者相繼通籍京師士大夫論松江人物者必舉此六人詩酒之會亦靡不從之而張君爲中書舍人早卒數年趙君殉難於金川 贈光祿寺卿又數年陸君以副都御史奉使歿於遼陽館舍惟余與君兄弟更踐中外今泉之以學士尙在京師而余與君皆久歸鄉里相距一舍有餘方幸扁舟過從踐東阡北陌之約且君精力尙強而乃遽以疾終嗚呼雖微君之末命余何忍不銘按君名省欽號白華冲之其字松江南滙人少英敏善屬文年十七爲諸生明年補廩乾隆二十二年

高宗純皇帝南巡獻賦 召試 賜舉人授內閣中書二十

八年成進士改庶吉士三十一年散館一等第二授編修三十三年大考翰詹一等第一擢侍讀尋充日講起居注官遷右庶子年遷學士年陞光祿寺卿命在書房行走明年陞順天府尹君以京兆治輦轂所轄二十七州縣政事繁重恐在內廷不能兼顧請辭書房之職

上是之又年陞禮部侍郎調工部又六年調吏部是年月充經筵講官嘉慶二年陞都察院左都御史後二年因保舉非人遂罷職君在翰林二十餘年以文學詞賦為聖主所知已丑辛卯壬辰充會試同考者三戊子充貴州正考官庚寅充廣西正考官辛卯充湖北正考官壬子充江西正考官己亥甲寅乙卯充浙江正副考官者三癸丑為會試

總裁丙午順天鄉試監臨乙卯充殿試閱卷官派教習庶吉士者三提督四川湖北直隸學政者四君歷主鄉會試所錄多知名之士迄今侍從臺諫及躋通顯者甚眾任學政教士子以博文好學不惑於時尚士子亦多樂而從之作詩本杜韓蘇三家古文本韓柳孫樵劉蛻及北宋諸名家刻琢凝練援引精密詩詞文共六十卷生平遇國家大典禮所進詩文各冊如說雍說壽諸篇皆蒙嘉獎留貯內府鈐以御寶時人咸以為榮

今上登極舉行千叟宴典禮君年止六十有九未合例已奉特旨令入宴賜如意壽杖等凡十六種又每年春正重華宮賦詩小宴惟大學士及內廷諸臣君亦皆參預至新刻石經勒成外廷二品皆不得與又蒙特旨賞賜皆非常

春融堂集卷五十六  
之典也其餘所賜字畫古硯朝珠紗縵等不能勝計君歸  
後嘗摩挲賜物至於泣下蓋追念

兩朝知遇之隆逾於常格故雖以殘年暮景尤感激而不能  
自已也君生於雍正七年某月某日卒於嘉慶八年八月某  
日年七十五歲曾祖燧祖啟秀父成九皆積學有行誼累贈  
工部侍郎曾祖妣某氏祖妣某氏妣某氏累封贈夫人妻查  
氏封亦如之先卒弟卽泉之名省蘭前官工部侍郎今爲翰  
林院侍講學士長子敬樞例得二品廕生次子敬沐尙幼女  
人孫一人樹榮卽於是年十月某日葬於婁縣白漾灘之  
原嗚呼自張趙陸三君之葬余皆志而銘其墓今余年八十  
矣追維生平笑言之雅顯顯然如在日中節巾待盡猶執筆  
而敘君之生平以傳於後曹子桓云旣傷逝者行自念也斯

尤可深悼也已銘曰

白漾之水清而泚佳城鬱鬱封于是九原不作今已矣君子  
有穀貽孫子

行與胡將天

白霓之水流而此君與胡將天于其公國不許今日有天子  
大河與胡將天曰

